

1:1 Nguru-nguruna, hangko damani dunia rapopewali, arami Ngkora. Ngkora iti, aminami hihimbela hai Pue Ala, hai Ngkora iti iami Pue Ala haduduaNa. 2 Nguru-nguruna Ia hihimbela hai Pue Ala. 3 Iami au napopatoa Pue Ala mampopewali hinangkana au ara. Bara ara hampaka au mewali ane bara Ia. 4 Iami pongkana katuwo. Hai katuwoNa mopamabaa laluna manusia. 5 Iami pewangka au mewangka liliu i lalu dunia au makaindi ide, hai Ia bara peisa nanangi kamakaindi. 6 Hambela tempo, hawemi hadua tauna au natudu Pue Ala, hangana Yohane. 7 Kamaina Yohane, ia mopahawe kana i pewangka iti i ope-ope tauna bona mohadihe posabina hai mepoinalai i pewangka iti. 8 Agayana Yohane bara pewangka iti. Ia mai pea mopahawe kana i pewangka iti i ope-ope tauna. 9 Ngkora iti iami pewangka au tou au mopamabaa lalunda ope-ope tauna. Iami au hawe i dunia. 10 Ia au napopatoa Pue Ala mampopewali dunia ide. Agayana i tempoNa ara i dunia, Ia bara raisa tauna. 11 Mogalo i tampona haduduaNa, bara ratarima. 12 Agayana hema-hema au motarima hai mepoinalai Iria, ihirami au Napopewali anana Pue Ala. 13 Barahe mewali anana Pue Ala hangko i karapoanakana, ba hangko i kuasa manusia ba hangko i peundeanda tauna. Batena Pue Ala mpuu au mampopewalihe anaNa. 14 Ngkora iti mewali manusia, Hai maida i olonta i dunia ide. Ikami, kiitami kamahilena kuasaNa. KuasaNa iti Nalambi hangko i UmaNa, lawi iami AnaNa HaduduaNa. LolitaNa tou mpuu, hai tongawa ope-ope kabulana laluNa irikita. 15 Yohane mampopaisa i tauna bosa kahemana Ngkora iti. Ia mopahawe masisimbuku, nauli: "Ia idemi au kupakanotoakau hangkoya! Kuuli: ara au ina mai roo iko, agayana meliu kuasaNa hangko iriko. Lawi hangko damanina rapoanaka, ara amimi Ia." 16 Bara mokahopoa ahiNa, hai hangko i ahiNa iti, Ia mowatimoke ope-ope. Bara mabotu-botu pewati au tahumba hangko Iria. 17 Hangkoya, Pue Ala motudu nabi Musa mopahawe AturaNa. Agayana anti kataisana katouna lolitana Yesu Kerisitu hai kabulana laluNa irikita, ido hai moisamoke Pue Ala. 18 Bara ara hadua au moita Pue Ala, Batena AnaNa Haduduana au ara liliu hihimbela hai Ia. Iami au mopakanotoake kahemana Pue Ala. 19 Idemi posabina Yohane au mopahawe kahemana Yesu. Hambela tempo, tadulakonda to Yahudi i Yerusale motudumohe

bahangkia tadulako menomba hai to Lewi lao i Yohane. Kahawenda i Yohane, rauliangaa: "Tunggaiaki mai inde bona mekune irio ba hemako. Ba Datu Topehompompuumoko?" 20 Nahanaihe Yohane i katou-touana, nauli: "Iko, barana Datu Topehompompu." 21 Mekune mbulihe: "Ane nodo, hemako? Ba nabi Eliako?" Nauli Yohane: "Bara." Mekune mbulihe: "Ba oyomi nabi mahile au radandi hangkoya au rauli ina mai i dunia?" Nauli Yohane: "Bara wori iko." 22 Hangko inditi, rauliangaa: "Ane nodo, nuuliangaangkai ba hema mpuuko, bona ara hanaina pekunenda au motudungkai. Apa pehanamu kana i watamu haduduamu?" 23 Nahanaihe Yohane hai lolitana nabi Yesaya hangkoya, nauli: "Iko ide, tauna au monganga-nganga i pada wungi: 'Ina hawe Pue. Nipasilolonga raraNa!' " (Yesaya 40:3) 24 Rauli mbuli suronda to Parisi iti: "Ane barako Datu Topehompompu, barako nabi Elia, hai bara woriko nabi au radandi, moapari pane baikomoriu tauna?" 26 Nauli Yohane: "Iko moriu tauna hai owai pea. Ide-ide arami hadua i olomi, agayana bara mani niisa. 27 Iami au hawe roo iko. Mogalorina mokakahi pekapu kandupana, barana hintoto." 28 Ope-ope iti mewali i boea Betania, i periuana Yohane i tanda orupena owai Yarade. 29 Kahalona, Yohane moitami Yesu mai iria. Nauli i tauna bosa: "Nipeita! Oloumi mai Ana Dimba au napasilolonga Pue Ala. Iami au ina mewali pahuruna watanta au mohompompu dosa manusia. 30 Iami au kuuli hangkoya ina hawe roo iko, agayana meliu kuasana hangko iriko. Lawi hangko damanina rapoanaka, Ia aminami ara. 31 Nguru-nguruna, bara mani wori kuisa kalanami Datu Topehompompu. Agayana idemi tunggaiaku, maina moriuhe to Israeli hai owai, bona kutudungiaahe kahemana Datu Topehompompu iti." 32 Ara wori posabina Yohane ide, nauli: "Nguru-nguruna bara mani kuisa kaYesuna Datu Topehompompu. Agayana Pue Ala motuduna moriu tauna hai owai, Nauliangaana node: 'Ane nuita Inao Malelaha mendaulu hai mengkatoa i hadua tauna, Iami au ina meriu hai Inao Malelaha.' Mewali, kuita mpuumi Inao Malelaha mendaulu hangko i suruga nodo tadasi manggebodo au mengkatoa i tanoanana Yesu. Ido hai kuuli: Yesu iami Anana Pue Ala." 35 Kahalona, Yohane ara wori inditi hihimbela hai rodua topeguruna. 36 Poitana Yesu moliu, nauli: "Peita, ehoumi Ana Dimbana Pue Ala!" 37 Karahadina topeguruna lolitana

Yohane, laomohe meula i Yesu. 38 Membalilimi Yesu, Naitahe meula. Napekunehe: "Apa au nihaoki?" Rauliangaa: "Guru, iumba paidaaMu?" 39 Nauli Yesu: "Maimokau, niita pea deade." Meulamohē Iria hawe i paidaaNa. Mepongka tinti iba duuna makaindi, inditimohe hihimbela hai Ia. 40 Tauna au rodua iti meulahe i Yesu anti pohadinda lolitana Yohane. Hadua hangko irihira, hangana Andaria, halaluna Simo Peturu. 41 Liliu Andaria lao mohaoki Simo, nauliangaa: "Kilambimi au rauli Mesias" (au rauli wori Kerisitu, lempona: Datu Topehompō). 42 Roo indo, naporangami lao i Yesu. Yesu mototoki Simo, Nauliangaa: "Oyo Simo anana Yohane. Agayana mepongka ide-ide, ina rahangako Kefas." (Lempona "Kefas" i lalu basanda to Yahudi, himbela hai lempona "Peturu" i lalu basa Yunani. Lempona: watu.) 43 Kahalona, Yesu motunggai lao i tampo Galilea. Hangko damani meangka, laomi mampombelambia Pilipu hai Nauliangaa: "Meulako Iriko!" 44 Pilipu iti, hangko i boea Betsaida, boeanda Andaria hai Peturu. 45 Hangko inditi, lao worimi Pilipu mampombelambia rangana au rahanga Natanael, nauliangaa: "Kilambimi Datu Topehompō, nodo au teuki i lalu Sura Aturana Musa hai suranda nabi hangkoya! Hangana Yesu. Iami anana Yusupu hangko i boea Nasare." 46 Mehana Natanael, nauli: "Ara wori pae au maroa au hangko i boea Nasare?" Nauli Pilipu: "Maimoko, bona nuita!" Laomohe i Yesu. 47 Kanaitana Yesu Natanael mai mampohidupaa, Ia mololita kana iria, Nauli: "Olou mai hadua to Israeli au mampeulai mpuu babehiana toiyorunta to Israeli, bara topodongko!" 48 Nauli Natanael: "Noumbari hai Nuisana, Guru?" Nauli Yesu: "Hangko damaniko nakakio Pilipu, Kuitamoko i woi kau ara." 49 Nauli Natanael: "Guru, Anana mpuuKo Pue Ala! Oyo mpuumi Datunda to Israeli!" 50 Nauli Yesu: "Ba nupoinalai lawi Kuuli kaKuitamu i woi kau ara? Ina nuita mbuli tanda kuasa au meliu kamahilena hangko iti." 51 Roo indo, nauli mbulimi Yesu: "Tou mpuu lolitaNgku ide: ina niita langi tebungkahi hai malaekana Pue Ala mengkahe hai mendaulu mai Iriko, Ana Manusia."

2:1 Liu rongalo hangko inditi, ara posusa petauna i boea Kana i tampo Galilea. Inana Yesu ara i posusa iti. 2 Yesu hai topeguruNa rakakio worihe

lao i posusa iti. 3 Tanganda mosusa, nakaopeihe anggoronda. InaNa Yesu manguli Iria: "Opemi anggoronda." 4 Nauli Yesu: "Ina, apa tunggaiamu mouliangaaNa nodo? Bara mani have tempona Kupopaisaahe kahemaNgku." 5 Hangko inditi, nauli inana Yesu i topobago susa: "Apa pea au natuduakau Yesu, nibabehi!" 6 I sou iti, ara ini mbuana kori au mahile au rababehi hangko i watu. Kori iti raihi owai pobahoia taye moula adanda to Yahudi. Kangkayana ihina kori iti, kira-kira hangatu lima pulona kati i haogu kori. 7 Yesu mouliangaahe topobago iti: "Niihi kori iti hai owai." Rapabuke mpuumi. 8 Roo indo, Nauliangaahe: "Tabuiki haodi, hai lao niantia topokadipura susa." Ratabuiki mpuumi hai raanti lao i topokadipura susa. 9 Topokadipura susa iti mampemina owai au raantia. Barapi matawaa nodo owai biasa, tebalikimi mewali anggoro. Agayana bara naisa kahangko iumbana mai anggoro iti, au moisa batenda pea topobago. Karoona mampemina anggoro iti, mokakiomi toratauna tobalilo, 10 nauliangaa: "Matama mpuu anggoro ide. Katouana moula adanta, anggoro au maroa hangangaa rakando iyoru i toposusa. Ane bahahe maenu, hangko rakandori au bara gaga maroa. Agayana oyo, nupaibokori anggoro au matama, hai ide-ide hangko nupopesuwuri." 11 Yesu mobabehi tanda kuasa au nguru-nguruna iti i boea Kana i tampo Galilea. Hai tanda kuasa iti, Ia mopatongawa peawaNa. Indo topeguruNa mepoinalaimohe Iria. 12 Roo posusa iti, laomi Yesu i boea Kapernaum hihimbela hai inaNa, halaluNa hai topeguruNa. Maidahe inditi bahangkia wengina. 13 Ina hawemi tempona alo mahile agama Yahudi au rauli Alo Posusa Pasa, ido hai laomi Yesu i Yerusale. 14 I tabangaa Souna Pue Ala, Ia moitahe tauna au mampobalu japi, dimba hai tadasi manggebodo. Ara worihe topointolohi doi au mohuda inditi i mejanda. 15 Kanaitana Yesu ope-ope iti, Ia mobabehimi pekandangi hangko i koloro hai mowura ope-ope japinda hai dimbanda hangko i tabangaa Souna Pue Ala. Nadungka-dungkami mejanda topointolohi doi, alana mahawu doinda. 16 Roo indo, Nauliangaahe topobalu-balu tadasi manggebodo: "Nianti ope-ope iti lao i raa! Souna UmaNgku inee nipopewali sou pobalubalua!" 17 TopeguruNa mokatuinao apa au teuki i lalu Sura Malelaha au manguli node: "Rumihi pampokaahiNgku SouMu Pue, itimi au mohuweki

laluNgku." (Mazmur 69:9) 18 Hangko inditi, tadulakonda to Yahudi mouliangaa Yesu: "Hema au moweiko kuasa mobabehi iti? Ane ara mpuu kuasaMu, Nupopaitaangkai hambua tanda kuasa!" 19 Nauli Yesu: "Nigeromide Souna Pue Ala ide, hai ina niita mpuu i lalu talu alona Kuaro hule." 20 Tingkaramohe tadulakonda to Yahudi, rauli: "Noumba? Souna Pue Ala ide raaro i lalu iba pulona hai ini parena. Agayana Nuuli ina Nuaro hule i lalu talu pea alona!" 21 Katouana wataNa haduduaNa au natunggai Yesu i tempona mokabelai Souna Pue Ala. 22 I katuwona hule Yesu, topeguruNa mokatuinao lolitaNa iti. Roo indo, mampoinalaimohe apa au teuki i lalu Sura Malelaha hai apa au nauli Yesu. 23 Tangana Yesu i Yerusale moula alo Posusa Pasa, bosa tauna mepoinalai Iria, lawi moitahe tanda-tanda kuasa au Nababehi. 24 Agayana Yesu haduduaNa, barahe Napoinalai, lawi Naisa haha apa au i lalunda ope-ope tauna. 25 Bara paraluu tauna mouliangaa kanoumbana manusia, lawi Naisa mpuu apa au i laluna manusia.

3:1 Ara hadua tauna au rahanga Nikodemus. Nikodemus iti iami to Parisi hai tadulako agama Yahudi. 2 Kaindimi, ia mai mampohidupaa Yesu, nauliangaa: "Guru, kiisa Oyo hadua guru au natuduKo mai Pue Ala, lawi bara ara tauna au peisa mobabehi tanda kuasa nodo au Nubabehi, ane bara naporangai Pue Ala." 3 Nauli Yesu: "Tou mpuu lolitaNgku ide: ane hadua tauna bara rapoanaka hule, bara peisa mewali taunana Pue Ala i lalu poparentaNa." 4 Nauli Nikodemus: "Noumbami kapeisana tauna au saemi rapoanaka hule? Peisa pae mesua hule i lalu taina inana hai rapoanaka mbuli?" 5 Nauli Yesu: "Tou mpuu lolitaNgku ide: ane tauna bara rapoanaka hai owai hai kuasana Inaona Pue Ala, bara peisa mewali taunana Pue Ala i lalu poparentaNa. 6 Manusia molambi katuwona watana hangko i tosaena. Agayana katuwona inaona nahumba hangko i Inao Malelaha. 7 Mewali, inee nupotingkara lolitaNgku ide au manguli: hangangaa rapoanaka hulekau. 8 Pandirina, himburu mewui iumba peundeana. Tahadi pewuina, agayana bara taisa hangko iumba kamaina hai iumba kalaoana. Nodo wori tauna au rapoanaka hule hai kuasana Inaona Pue Ala." 9 Nauli Nikodemus: "Noumba pewalina iti?" 10 Nauli Yesu:

"Oyo hadua guru agama to Israeli au rabila. Bara pae nuisa lempona lolitaNgku ide? 11 Tou lolitaNgku ide: ikami mouli apa au kiisa, kipololita apa au kiita. Agayana bara niunde motarima lolitangki. 12 Kutuntuakau apa au mewali i dunia, agayana bara nipoinalai lolitaNgku. Apa mani ane Kutuntuakau apa au mewali i suruga. 13 Bara ara hadua hangko i dunia ide au mengkaore lao i suruga. Batena pea Iko, Ana Manusia, au moisa apa au mewali i suruga, lawi Iko au maida i suruga hangkoya, hai mendauluNa mai hangko i suruga. 14 Hangkoya i pada wungi, nabi Musa mobabehi ile hangko i tambaga, hai nawoli i wuntu kau hangkau hai naaro. Hema peahe au natilo ile hai mampengoahē ile tambaga iti, maoha hai tuwohe. Mewali, nodo ile tambaga iti rapamapangka i pada wungi, nodo wori Iko Ana Manusia hangangaa rapamapangka i kau mombehape, 15 bona hema au mepoinalai Iriko ina molambi katuwo maroa au bara mokahopoa." 16 Anti kamahilena ahina Pue Ala i ope-ope tauna i dunia, ido hai Nakirami AnaNa au HaduduaNa, bona hema pea au mepoinalai Iria, bara rahuku, agayana molambi katuwo maroa au bara mokahopoa. 17 Pue Ala bara motudu AnaNa mai i dunia bona mohuku manusia. TunggaiaNa motudu mai AnaNa bona mohorema manusia hangko i huku dosanda. 18 Tauna au mepoinalai i Anana Pue Ala, barahe rahuku. Agayana tauna au bara mepoinalai, manotomi kanahukunda Pue Ala, lawi barahe mepoinalai i Anana Pue Ala au Haduduana. 19 Hawemi Anana Pue Ala i dunia moanti kamabaana i ope-ope tauna. Agayana manusia mounde mani kakaindiana pane kamabaana, lawi kadake babehianda. Ido hai Pue Ala mohukuhe. 20 Ope-ope tauna au mobabehi dake, mokahihihe kamabaana. Barahe mau mohungkuki kamabaana dati raita tauna babehianda au kadake. 21 Tauna au manoto babehianda, maihe i kamabaana bona babehianda raita hai tongawami poulanda peundeana Pue Ala. 22 Roo indo, Yesu hai topeguruNa laohe i tampo Yudea. Maidahe inditi bahangkia alona, moriuhe tauna. 23 I tempo iti, Yohane bara mani ratarunggu. Meriu i boea Aion, bara karao hangko i boea Salim, lawi inditi ngkaya owai. Alo-alona tauna lao mampoperiu i Yohane. 25 Hambela tempo, bahangkia topeguruna Yohane mombehehemohe hai hadua to Yahudi mampombehanaingi ada pobahoi moula agamanda. 26

Laomohe i Yohane, rauliangaa: "Guru, ba nukatuinao mani hangkoya hadua tauna au hihimbela hai ikita i tanda orupena owai Yarade au nutudungiangkai? Ia meriu wori, hai kabosa-bosaari tauna au lao Iria!" 27 Nauli Yohane: "Ikita manusia bara peisa mobabehi apa-apa ane barake Nawei kuasa au hangko i Pue Ala. 28 Hangkoya, nihadi mpuumi lolitangku au manguli: 'Iko barana Datu Topehompō. Hai tunggaiana kamaingku, maina mopasilolongaa raraNa.' " 29 Napaliliu Yohane lolitana, nauli: "Pandirina, i posusa petauna, toratauna tobalilo au mewali patoa, iami ampuna towawine au rabua. Ane tauna au mamporangai toratauna tobalilo, meangka peahe mohiawe hai mampehadingi hawana. Matanahe mohadi lolitana toratauna tobalilo. Nodo wori iko, iko nodona tauna au mamporangai toratauna tobalilo iti. Matanana, hai rumihi kamatanangku mohadi lolitana Yesu. 30 Lawi Iami au hangangaa kamahile-hilea tuwoNa, hai ikomi au hangangaa kakoi-koia tuwongku." 31 Yesu iami au mai hangko i suruga, hai meliu kuasaNa hangko i hinangkana. Tauna au hangko i dunia, batena manusia biasa, hai lolitanda mopahawe apa au mewali i dunia. Agayana Yesu, hangko i suruga, au meliu kuasaNa hangko i hinangkana. 32 Ia mololita kana i apa au Naita hai au Nahadimi, agayana bara ara au mampoinalai lolitaNa. 33 Tauna au mampoinalai lolitaNa, mopangaku katouna Pue Ala. 34 Lawi Iami au natudu Pue Ala mohowara lolitaNa, hai Pue Ala mowei Inao Malelaha Iria au bara ara hokana. 35 Pue Ala Umanta mampokaahi AnaNa hai moweimi ope-ope kuasaNa. 36 Tauna au mepoinalai i AnaNa iti, molambimohe katuwo maroa au bara mokahopoa. Agayana tauna au bara mengkoru i Anana Pue Ala, barahe molambi katuwo. Molambirihe pehukuna Pue Ala au bara mokahopoa.

4:1 To Parisi mohadimohe bambari au manguli kabosa-bosaami tauna au lao mampoperiu i Yesu, alana meliu kabosanda tauna au meula i Yesu pane tauna au meula i Yohane. 2 (Katouana, bara Yesu au meriu, topeguruNari au meriu.) 3 Kanaisana Yesu apa au rahadi to Parisi iti, Ia padumi hangko i tampo Yudea mesule lao i tampo Galilea. 4 I lalu polumaona iti, Ia hangangaa moliu i tamponda to Samaria. 5 I tanga pualo, hawemi i boeanda to Samaria au rahanga Sikar, bara karao hangko i tampo au nawei

Yako hangkoya i Yusupu anana. I raoa boea iti, ara hambua tibubu au rahanga tibubuna Yako. Mohudami Yesu i wiwi tibubu iti, lawi mawowemi molumao. 7 TopeguruNa liliuhe lao i boea meholo paandenda. Bara mani mahae, hawemi hadua towawine to Samaria mai mantambu. Yesu mouliangaa: "Ina, wei wongkoya owai Kuenu." 9 Tingkara laluna towawine iti, lawi biasana bara raunde to Yahudi mampogaloahe to Samaria. Ido hai nauli: "Oyo to Yahudi, iko to Samaria. Moapari pane merapiKo owai iriko?" 10 Nauli Yesu: "Ane kenuisa kamahilena pewati au nawei Pue Ala hai kahemaNgku au merapi owai, kemerapi woriko owai Iriko, hai Kuweiko owai ngkatuwo." 11 Nauli towawine iti: "Hangko iumba owai ngkatuwo au Nuuli iti? Lawi bara ara popetambuMu, hai tibubu ide kaladu. 12 Tibubu ide sosorangki hangko i Yako, toiyorungki hangkoya. Ia maenu owai hangko inde, nodo worihe anana hai binatangana. Ba Nuuli meliu kamahilena tuwoMu hangko i Yako pane peisaKo mowei owai au meliu kamaroana hangko i owai tibubu ide?" 13 Nauli Yesu: "Ope-ope tauna au maenu owai hangko i tibubu ide, ina mangkadou hulehe. 14 Agayana hema au moenu owai au Kuwei, barapohe mangkadou duuna kamahae-haea. Lawi owai au Kuweihe iti, mewali owai ngkatuwo au moili liliu i lalunda; lempona, molambihe katuwo maroa au bara mokahopoa." 15 Nauli towawine iti: "Ane nodo tua, Nuweimona owai iti, bona barapona mangkadou, hai barapona paraluu mai mantambu alo-alona inde." 16 Nauli Yesu: "Laomoko hampai mokakio tobalilomu, pane mesuleKo mai." 17 Nauli towawine iti: "Bara ara tobabelongku." Nauli Yesu: "Tou lolitamu. Bara ara tobalilomu, 18 lawi limami belamu motambi, hai tobalilo au nuporangai ide-ide, barato tobalilomu. Mewali, tou mpuu lolitamu inona." 19 Nauli towawine iti: "Ide-ide kuisami, Oyo hadua nabi! 20 Ikami to Samaria menomba i bulu ide, i bulu penombaanda toiyorungki. Agayana pangulimi to Yahudi, i Yerusale pea penombaa au tou." 21 Nauli Yesu: "Nupoinalai lolitaNgku ide: ina hawe tempona, bara i Yerusale tauna menomba i Pue Ala, hai bara wori i bulu ide. 22 Ikamu to Samaria, bara niisa kahemana au nipenombai. Ikami to Yahudi, kiisa kahemana au kipenombai, lawi ara dandina Pue Ala au manguli katuwo maroa ina hawe i manusia hangko i to Yahudi. 23 Agayana ina hawe

tempona, hai katouana hawemi tempona iti, tauna au menomba i Pue Ala Umanta, hangangaa menombahe Iria hangko i lalunda mpuu moula rara au tou. Popenomba itimi au naunde Pue Ala Umanta. 24 Pue Ala iami Inao. Ido hai tauna au menomba Iria, hangangaa menomba hangko i lalunda mpuu moula rara au tou." 25 Nauli towawine iti: "Au kuisa, ina hawe Datu Topehompō, au rauli Kerisitu. Ane hawe, Iami au ina mopakanoto irikita hinangkana au ara." 26 Nauli Yesu: "Ikomi ide, au tangaNgku mololita irio." 27 Tanganda mani mololita, hawemohe topeguruNa hangko i boea. Tingkarahe moita Yesu mololita hai hadua towawine. Agayana bara ara hadua au bai mekune i towawine iti ba apa paraluuna. Bara worihe bai mekune i Yesu ba apa tunggaiaNa mololita iria. 28 Roo indo, towawine iti mopalehimi pambolia owaina, pane laomi i boea mouliangaaha tauna inditi: 29 "Ane maroa, laoke mampeita hadua tauna au mouliangaana ope-ope babehiangku. Ba Ia mpuumi Datu Topehompō?" 30 Ido hai laomohe i raea boea bona mampohidupaahe Yesu. 31 Tangana towawine iti lao i boea, topeguruna Yesu mouliangaa: "Guru, maandemoke." 32 Agayana nauli Yesu: "Ara paandeKu au bara niisa." 33 Mombekune-kunemohe topeguruNa, rauli: "Hemari au moantia paandeNa?" 34 Ido hai nauliangaahe Yesu: "PaandeKu, iami moulaNa peundeana Pue Ala au motuduNa, hai moparooNa bago au Naweina. 35 Ikamu biasa manguli node: iba mani wulana, hangko meparerike. Agayana Iko mouliangaakau: nipeita olou bonde. Mabadami parena, sukanami rapepare. 36 Tauna au mopahawehe Ngkorana Pue Ala peisa rapandiri nodo tauna au mantuda hai au mepare. Mepongka ide-ide, ngkaya wua au rapepare. Anti pobagonda, bosa tauna molambi katuwo maroa au bara mokahopoa. Topepare iti ina molambi mpuu saronda. Ina matana-tanahe hihimbela hai tauna au mantuda. 37 Mewali, tou mpuu lolita au manguli: 'Hadua au mantuda, tohaduana au mampepare.' 38 Kutudukau lao mepare i bonde au bara nitudai. Tauna ntaninari au mantuda, ikamumi au mampepare wua pobagonda." 39 I boeanda to Samaria, bosa tauna mepoinalai i Yesu, lawi mohadihe lolitana towawine iti inona au manguli: "Nauliangamona hinangkana babehiangku." 40 Mewali, laomohe mampohidupaa Yesu, pane raperapi ntepuu bona mehupe i boeanda. Ido hai Yesu maida inditi

rombengi. 41 Hangko inditi, kabosa-bosaa ampu boea au mepoinalai i Yesu, lawi mampehadingi mpuumohe lolitaNa. 42 Rauli ampu boea i towawine iti: "Ide-ide kipoinalai mpuumi, bara pea hangko i lolitamu, agayana lawi kihadimi lolitaNa, hai kiisa kaIana mpuumi Datu au mohorema manusia hangko i huku dosanda." 43 Liumi rongalo i Samaria, Yesu mopaliliumi polumaoNa lao i tampo Galilea. 44 Yesu haduduana au manguli: "Hadua nabi bara rabila i tampona haduduana." 45 Kahawena i Galilea, ampu boea motarima Yesu hangko i lalunda mpuu, lawi arahe hangkoya i Yerusale i tempona Yesu moula Alo Posusa Pasa, hai moita matahe ope-ope tanda kuasa au Nababehi i tempo iti. 46 I tampo Galilea, hawe mbulimi Yesu i boea Kana, i boea pampopewaliaNa owai mewali anggoro. Inditi ara hadua tuana au mobago i souna datu i boea Kapernaum. Anana, rumihi kamahaina. 47 Kanahadina tuana iti kamaina Yesu hangko i Yudea hawe i tampo Galilea, laomi i boea Kana mampohidupaa, nauliangaa: "Guru, laoke i Kapernaum, Nupakaohaana wongkoya anangku, lawi ina mate." 48 Nauli Yesu iria: "Ikamu au maida i tempo ide, ane barakau moita tanda kuasa, barakau ina mepoinalai!" 49 Nauli tuana iti: "Guru, laomoke holiga, lawi ina mate anangku!" 50 Nauli Yesu: "Mesulemoko, maohami anamu." Tuana iti mampoinalai mpuu lolitana Yesu, hai mesulemi. 51 Tangana mani i rara, bahangkia hawina mai mampohidupaa, rauliangaa: "Maohami anamu!" 52 Napekunehe: "Tinti hangkia maoha?" Rauli: "Imaindi, tinti isa pualo, mengkaroomi kanapawembena." 53 Naisami tuana, i tempona Yesu mouliangaa: "Maohami anamu," tempo iti womi maoha. Hangko indo, tuana iti mepoinalaimi i Yesu hihimbela hai ope-ope tinana. 54 Itimi tanda kuasa karombelana au nababehi Yesu i Galilea i kahaweNa hangko i Yudea.

5:1 Roo indo, mesulemi Yesu lao i Yerusale bona moula alo mahilenda to Yahudi inditi. 2 I Yerusale hungku i babaka au rahanga "Babaka Dimba", ara hambua wuhu; i lalu basa Yahudi hangana Betesda. Ara lima mbuana tambale au motoleliki wuhu iti. 3 Bosa tomahai mogulu inditi. Arahe au bilo, au wara bitinda, hai au palu, ope-opehe matura liliu i tambale, mampegiahe pokalena owai. 4 Lawi hambela-hambela ara malaekana Pue

au mendaulu mai i wuhu iti mampopokale owai. Hai hema au iyoru mendaulu i lalu wuhu i tempona owai mokale, maohami hangko i hakina. 5 Ara inditi hadua tobalilo, talumi pulona hai ualu parena mahai. 6 Yesu moita ia matura inditi, hai Naisa kamahaenami mahai. Napekune: "Nuunde pae maoha?" 7 Nauli tomahai iti: "Pue, bara wongkoya ara au moantina lao i lalu wuhu i tempona owai mokale. Kelaona, arami au mampehindorongina." 8 Nauli Yesu: "Mearomoko, nulolomi alemu, hai molumaomoko." 9 Maoha mpuumi tauna iti, nalolo alena, hai molumao. Iti mewali i alo Satu, alo penombaanda to Yahudi. 10 Ido hai tadulakonda to Yahudi mokambaroa tauna au hangko maoha iti, rauliangaa: "Ide alo penombaa! Barako peisa moanti alemu." 11 Nauli tauna iti: "Natuduna tauna au mopakaohana inona, Nauliangaana: 'Lolomi alemu hai molumaomoko.'" 12 Rapekune: "Hema au motuduko moanti alemu hai molumao?" 13 Agayana bara naisa kahemana au mopakaoha, lawi Yesu padu ngkandii hai barapi raita i olonda tauna bosa. 14 Bara mahae hangko inditi, Yesu mamphidupaami tauna iti i Souna Pue Ala, Naulianga: "Maohamoko, ineemoko mobabehi dosa, bona datiko narumpa ba apa-apa au meliu kakadakena." 15 Hangko inditi, laomi tauna iti mamphidupahe tadulakonda to Yahudi, nauliangahe kaYesuna au mopakaoha. 16 Ido hai tadulakonda to Yahudi mohaoki rara mopakasusa Yesu, lawi Ia mepakaoha i alo penombaa. 17 Yesu mouliangahe: "UmaNgku mobago duuna ide-ide, hai Iko wori mobago." 18 Hangko inditi, tadulakonda to Yahudi mopari-pari mohaoki raranda mopapate. Mobabehihe nodo, bara pea anti kaNaliungina ada i alo penombaa, agayana lawi Nauli wori kaPue Alana UmaNa; lempona, Ia mopahimbela wataNa hai Pue Ala. 19 Mehana Yesu, Nauli: "Tou mpuu lolitaNgku ide: Iko Anana Pue Ala, barana peisa mobago moula peundeaKu haduduaNgku. Kuitami apa au Nababehi UmaNgku, hai batena itimi au Kupobago. Apa pea bagona UmaNgku, iti wori bagoNgku, 20 lawi UmaNgku mampokakayaNa, hai Napopaitaana ope-ope au Nababehi. Hai ara mbuli bago au ina Napopaitaana au meliu kamahilena hangko i bago au roomi Kubabehi. Ina Kubabehi bago iti alana tingkara mpuukau. 21 Nodo UmaNgku mampopearo tomate hai moweihē katuwo, Iko wori moweihē katuwo i hema pea moula peundeaKu. 22

UmaNgku barapi mobotusi hinangka kara-karana manusia, agayana kuasa pobotusi iti Nahuhumi Iriko, AnaNa. 23 Ia mobabehi nodo, bona ope-ope tauna mobilaNa nodo pebilanda i UmaNgku. Hema au baraNa mobila, bara worihe mobila UmaNgku au motuduNa. 24 Tou mpuu lolitaNgku ide: hema-hema au mampehadingi lolitaNgku hai mepoinalai i Pue Ala au motuduNa, molambihe katuwo maroa au bara mokahopoa. Barahe ina rahuku anti dosanda. Tekabahamohe hangko i kapate, hai molambihe katuwo. 25 Tou mpuu lolitaNgku ide: ina hawe tempona hai katouana hawemi tempona tomate ina mohadi wotuna Anana Pue Ala, hai ihira au mohadi wotuNgku ina molambi katuwo au wou. 26 Lawi UmaNgku makuasa mowei katuwo. Nodo wori, NaweiNa kuasa mowei katuwo. 27 Nawei woriNa kuasa mobotusi kara-kara manusia, lawi Iko Ana Manusia. 28 Inee nipotingkara lolitaNgku ide, lawi hambela tempo ope-ope tauna au mate ina mohadi wotuNgku, hai ina mearohe hangko i talumbanda. Tauna au mobabehi roa ina rapopearohe bona molambihe katuwo maroa. Agayana tauna au mobabehi dake ina rapopearohe bona rahuku." 30 "Iko, baraNa peisa mobabehi apa-apa moula peundeaku haduduaNgku. Kubotusi hinangkana moula apa au nahawaaNa UmaNgku. PebotusiNgku manoto, lawi baraNa moula peundeaku haduduaNgku, moulariNa peundeana Pue Ala au motuduNa. 31 Ane rapana Iko haduduaNgku au mouli kahangko i Pue AlaNgu, hai bara ara tauna ntanina au mosabikiNa, kebara niisa ba tou lolitaNgku ba bara. 32 Agayana ara au ntanina au mosabikiNa iami UmaNgku, hai Kuisa katouna posabikiNa. 33 Hangkoya ikamu motudukau suromi lao i Yohane mampekune kana Iriko, hai ia mouliangahe posabikina. Apa au nauli iti, ope-ope batena tou. 34 Agayana katouana bara Kuparaluu posabi hangko i manusia. Kupopaingakau lolitana Yohane iti, bona molambikau katuwo maroa. 35 Yohane iti nodo hulo au mewangka hai moanti kamabaana irikamu. Hai ikamu, matana mpuukau mohadi lolitana. Agayana kamatanami iti sangka pea. 36 Agayana Iko, ara sabiNgku au mopakanoto kahemaNgku, hai sabi iti meliu hangko i posabina Yohane. Ane niita pobagoNgku, itimi au mopakanoto kahemaNgku. Apa au Kubabehi ide-ide iami bago au nahawaaNa UmaNgku bona Kuparoo. PobagoNgku idemi au mopakanoto

kalkona au natudu UmaNgku mai i dunia ide. 37 Hai meliu hangko iti, UmaNgku au motuduNa mai, Ia haduduaNa mewali sabiNgku bona mopakanoto kalkona suroNa. Agayana ikamu, bara mani hambela nihadi wotuNa, bara mani niita lenggeNa. 38 LolitaNa bara niwoli i lalumi, lawi barakau mepoinalai Iriko au Natudu mai. 39 Moparesamokau Sura Malelaha, lawi nipehangu hangko i Sura Malelaha iti nilambi katuwo maroa au bara mokahopoa. Hai Sura Malelaha iti au mololita kana Iriko. 40 Agayana nauri nodo, bara mani niunde mai Iriko bona molambikau katuwo maroa. 41 BaraNa mampepotoya i manusia. 42 Agayana Kuisa mpuukau, kadana ara ahimi i Pue Ala. 43 UmaNgku au motuduNa mai. KuasaNgku kulambi hangko Iria, agayana baraNa nitarima. Ane arahe au mai i lalu kuasanda haduduanda, nitarimamohe. 44 Noumba pepoinalaimi Iriko? Lawi mampeinao peakau ratoya rangami, bara niunde mobaliki babehiami bona Pue Ala HaduduaNa motoyakau. 45 Agayana inee nipehangu kalkona au ina mosalaikau i UmaNgku. Nabi Musari au ina mosalaikau. Nipehangu anti peulami i hawana Musa ina molambikau katuwo maroa. 46 Agayana ane tou-tou nipoinalai mpuu Musa, manoto nipoinalai woriNa, lawi apa au nauki Musa, itimi au mampololitaNa. 47 Ane bara nipoinalai apa au nauki Musa, apa mani lolitaNgku."

6:1 Roo indo, laomi Yesu i tanda orupena Rano Galilea, au rahanga wori Rano Tiberias. 2 Bosa mpuu tauna meula Iria, lawi moitahe ope-ope tanda kuasa au Nababehi i kamopakaohaNa tomahai. 3 Yesu mempanaimi lao i tongku-tongkuna hihimbela hai topeguruNa, hai mohudahe inditi. 4 I tempo iti, ina hawe alo mahile agama Yahudi au rahanga alo Posusa Pasa. 5 Napeitami Yesu mantoleli, mokoloromohe tauna bosa mai mohungkuki Ia. Nauli i Pilipu: "Iumbake moholo paande, tapaandeahe tauna au node kabosanda?" 6 (Katouana, naisa Yesu apa au ina Nababehi. Napekune nodo i Pilipu, lawi napeinao Yesu mampetandaka pepoinalaina.) 7 Nauli Pilipu: "Kehapiri rongatu doi pera tapopeholo paande hai taweihe ope-ope tauna, bara ina handa nauri haodi-haodi pea rawei hadua." 8 Hangko inditi, hadua topeguruNa au rahanga Andaria, halaluna Simo Peturu, manguli: 9 "Inde ara hadua anangkoi au mebaku lima oguna roti hai rombaa ikane,

agayana apami pae pobunduana i tauna bosa ide?" 10 Nauli Yesu: "Popohudahe!" Mohuda mpuumohe, hai i pohudaanda iti ara ngkaya hehi. Kabosanda tauna iti, kira-kira lima sabuna tobalilo, bara raimba towawine hai anangkoi. 11 Hangko inditi, naalami Yesu roti, Napekakaengaa, hai Nakira-kira i tauna bosa au tanganda mohuda. Nodo wori kaNababehina i ikane. Maandemohe ope-ope duunda mabuhu. 12 Mabuhumohe ope-ope, nauli Yesu i topeguruNa: "Nigulu pentarana, bona dati ara au ratende mbero." 13 Ragulu mpuumi, hampulo hai rombingka pentarana hangko i lima oguna roti au raande tauna bosa inona. 14 Karaitanda tauna bosa tanda kuasa iti, mololitamohe hadua hai hadua, rauli: "Ia mpuumi nabi au radandi hangkoya, au rauli ina mai i dunia!" 15 Mewali, ara tunggaianda mopari-pari Ia mewali datunda. Kanaisana Yesu tunggaianda, Ia padumi hangko inditi lao i tongku-tongkuna mampasadudua. 16 Kalumbami, mendaulumohe topeguruNa lao i rano mampegia kahawena Yesu. 17 Yesu rapegia duuna makaindi, agayana bara mani hawe. Mewali, moduangamohe lao monontohi boea Kapernaum. 18 Tanganda moduanga, hawemi himburu kebuu, alana mahile balumba i rano. 19 Karoonda mobohe lima ba ini kilo hangko i wiwi rano, moitamohé Yesu molumao i wongko owai mai modupahe. Langa mpuumohe. 20 Nauli Yesu: "Inekau langa! Ikoto dide." 21 Karahadina wotuna, matanamohe motarima Yesu i duanganda. Pesawina Yesu i lalu duanga, hampalai pea hawemohe i wiwi rano au ratunggai. 22 Kahalona, bosa tauna i tanda orupena rano mohaoki Yesu, rauli: "Iumbami? Bara moduanga hihimbela hai topeguruNa inona. Agayana bara ara duanga ntanina inde, batena pea duanga au rapesawii topeguruNa." 23 Roo indo, hawemohe tauna hangko i kota Tiberias i lalu duanganda, hai mesorehe hungku i paandeanda tauna bosa hangkoya au maandehe roti au nawati Pue Yesu. 24 Karaisana tauna bosa kadanapi ara Yesu inditi hai topeguruNa bara wopohe ara, moduangamohe lao i boea Kapernaum mohaoki Ia. 25 Kahawenda tauna bosa i tanda orupena rano mampohidupaa Yesu, rapekune: "Guru! ImpiraKo hawe inde?" 26 Mehana Yesu: "Tou mpuu lolitaNgku ide: Kuisa tunggaiami mohaokiNa. Bara pae niisa lempona tanda kuasa au Kubabehi? NihaokiNa lawi mabuhumokau Kupaande. 27 Inekau mobago mohaoki paande au hampalai kaopena hai

au polo mawai. Mobagomokau mohaoki paande au bara peisa mawai hai au mowei katuwo maroa au bara mokahopoa. Iko Ana Manusia au mowei paande iti, lawi Ikomi au Napilei Pue Ala hai au Napokatana." 28 Mekunehe tauna bosa: "Apa au hangangaa kipobago bona pobagongki moula peundeana Pue Ala?" 29 Nauli Yesu: "Idemi bago au naunde Pue Ala: mepoinalaikau Iriko au Natudu mai." 30 Rauli mbuli tauna bosa: "Ane nodo, tanda apa au Nupopaitaangkai, bona kipoinalai kahangko i Pue Alana mpuuKo? Apa au ina Nubabehi? 31 Wei wongkamia paande, nodo au raande toiyorunta hangkoya. Tanganda i pada wungi, maandehe paande au rahanga manna, nodo au teuki i lalu Sura Malelaha: 'Pue Ala moweihe paande hangko i suruga.' " 32 Nauli Yesu: "Tou mpuu lolitaNgku ide: bara nabi Musa au mowei paande hangko i suruga. UmaNgku au moweikau paande au tou-tou hangko i suruga. 33 Paande au naweikau Pue Ala, lempona, hadua au mendaulu mai hangko i suruga hai au mowei katuwo i manusia." 34 Rauliangaa tauna bosa: "Ane nodo, wei wongkamia paande iti alo-alona!" 35 Nauli Yesu: "Ikomi ide paande au mowei katuwo. Hema au mai Iriko hai mepoinalai, barapohe marimi hai barapohe mangkadou duuna kamahae-haea. 36 Agayana, nodo au Kuuli inona, kehapiriNa niita, bara maniNa nipoinalai. 37 Ope-ope tauna au naweimoNa UmaNgku, batena mai Iriko. Hai hema-hema au mai Iriko, batena Kudoko hai bara Kusapuaka. 38 Lawi kamaiNgku hangko i suruga, baraNa mobabehi peundeaku haduduaNgku. MaiNa mobabehi peundeana Pue Ala au motuduNa. 39 Idemi peundeana: bona hangko i ope-ope tauna au NawaiNa, inee ara hadua au matanta; batena Kupoperohe ope-ope hangko i kapate i alo pobotusi kahopoa dunia. 40 Idemi peundeana UmaNgku: bona ope-ope tauna au moitaNa hai au mepoinalai Iriko AnaNa, ina molambihe katuwo maroa au bara mokahopoa, hai ina Kupoperohe i alo pobotusi kahopoa dunia." 41 Hangko inditi, mohume-humemohe to Yahudi, lawi nauli Yesu kaIanami paande au mendaulu mai hangko i suruga. 42 Mololitamohe, rauli hadua hai hadua: "Bara pae Yesu iti, anana Yusupu? Taisa mpuu inaNa hai umaNa. Moapari hai Nauli kaIana hangko i suruga?" 43 Yesu mouliangahe: "Ineekau mohume-hume. 44 Bara ara hadua au peisa mai Iriko, ane bara naanti

UmaNgku au motuduNa. Hai hema pea au mai Iriko ina Kupopearo hangko i kapate i alo pobotusi kahopoa dunia. 45 I lalu sura nabi-nabi hangkoya teuki node: 'Pue Ala ina mopaguru ope-ope topeulaNa.' (Yesaya 54:13) Mewali, ope-ope tauna au mohadi hai motarima paturona UmaNgku, batena maihe Iriko. 46 Ineeri nipehangu arahe au moita UmaNgku. Batena pea Iko au moita, lawi Iko hangko i Pue Ala. 47 Tou lolitaNgku ide: hema au mepoinalai Iriko, molambihe katuwo maroa au bara mokahopoa. 48 Ikomi paande au mowei katuwo. 49 Paande au rahanga manna au raande toiyorumi hangkoya i pada wungi bara mowei katuwo, lawi matemohe ope-ope. 50 Agayana bara nodo paande au mendaulu mai hangko i suruga. Hema pea au maande paande ide, barahe mate. 51 Ikomi ide paande au mendaulu mai hangko i suruga, paande ngkatuwo! Tauna au maande paande ide molambihe katuwo au bara mokahopoa. Paande ngkatuwo ide, lempona wataNgku au Kukira bona manusia molambi katuwo." 52 Karahadina to Yahudi lolitana Yesu iti, mombehanaimohe hadua hai hadua, rauli: "Noumba hai peisa mokira wataNa irikita bona taande?" 53 Ido hai Nauliangahe: "Tou mpuu lolitaNgku ide: ane bara niande wataNgku, Iko Ana Manusia, hai bara nienu waheNgku, barakau ina molambi katuwo duuna kamahae-haea. 54 Tauna au maande wataNgku hai moenu waheNgku, molambihe katuwo maroa au bara mokahopoa, hai Kupopearohe hangko i kapate i alo pobotusi kahopoa dunia, 55 lawi wataNgku tou-tou mpuu paande, hai waheNgku tou-tou mpuu paenu. 56 Tauna au maande wataNgku hai moenu waheNgku, mohintuwu liliuhe hihimbela hai Iko, hai Iko hai ihira. 57 UmaNgku au motuduNa, Iami pongkana katuwo, hai Iko tuwo hangko Iria. Nodo wori tauna au maande wataNgku, molambihe katuwo hangko Iriko. 58 Iti mpuumi paande au mendaulu hangko i suruga. Paande iti bara nodo manna au raande toiyorumi hangkoya. Naurihe maande manna iti, batenda mate. Agayana tauna au maande paande ide, ina tuwohe duuna kamahae-haea." 59 Yesu mopahawe ope-ope iti i tempona mepaturo i sou penombaa i Kapernaum. 60 Karahadina topeulaNa lolitaNa, bosae au manguli: "Ae! Mapari mpuu paturo iti. Hema pae au peisa moisa lempona?" 61 Agayana naisa Yesu pohume-humenda topeulaNa. Ido hai

Nauliangahe: "Ba nipohumpuinao mohadi paturuNgku inona? 62 Ane nodori, noumba ane niitaNa, Iko Ana Manusia, mengkaore lao i paidaaNgku nguru-nguruna? 63 Inaonami Pue Ala au mowe i katuwo. Kamaroho manusia bara mobundu. LolitaNgku au Kupahaweakau mesuwu hangko i Inaona Pue Ala hai mowe i katuwo. 64 Agayana nauri nodo, ara mpuu hantanga hangko i olomi au bara mepoinalai." Nauli Yesu nodo lawi Naisa mpuumi hangko i nguru-nguruna kahemanda au bara ina mepoinalai Iria, hai Naisa wori kahemana au ina mampobalu wataNa i iwaliNa. 65 Nauli mbuli Yesu: "Ido hai Kuuli inona, bara ara hadua au peisa mai Iriko ane bara nanini UmaNgku Iriko." 66 Mepongka i tempo iti, bosa topeulaNa mopalehi. Barapi raunde meula Iria. 67 Mewali, Yesu mekune mbulimi i topeguruNa au hampulo hai rodua, Nauli: "Ba ina nipalehi woriNa?" 68 Nauli Simo Peturu: "Ane kipalehiKo Pue, i hemamongkai lao? Oyo pea au mohowara lolita au mowe i katuwo maroa duuna kamahae-haea. 69 Ikami, kipoinalaimi hai kiisa kaOyona Suro au malelaha hangko i Pue Ala." 70 Nauli Yesu: "Iko mpuumi au mopileikau au hampulo hai rodua ide. Nauri nodo, ara hadua hangko irikamu au ara tokadake i laluna." 71 Au natunggai Yesu iami Yudasi anana Simo Iskariot. Lawi nauri Yudasi mewali hadua hangko i hampulo hai rodua topeguruNa, iami au ina mampobalu Yesu i iwaliNa.

7:1 Roo indo, Yesu lao i humalele tampo Galilea. Barapi Naunde lao i tampo Yudea, lawi arahe tadulakonda to Yahudi inditi au mampeinao mopapate. 2 I tempo iti, ina hawe alo mahilenda to Yahudi au rauli Posusa Pobambaru. 3 Ido hai rauli halaluna Yesu Iria: "Ineeko inde liliu! Laomoko i Yudea, bona topeulaMu moita tanda kuasa au Nubabehi. 4 BaraKo ina mewali tauna mahile ane inde liliuKo. Ane mobabehiKo tanda kuasa, hangangaa Nupopaitahe ope-ope tauna i dunia!" 5 Nodomi lolitanda halaluna Yesu, lawi bara worihe mepoinalai Iria. 6 Yesu mouliangahe: "Bara mani hawe tempona Kupatongawahe wataNgku. Ane ikamu, bara moapa ba impirakau lao i Yerusalem, 7 lawi bara ara tauna au mokahihikau. Iko, rakahihiNa tauna au kadake i dunia ide, lawi Kupakanotoahe kakadakena babehianda. 8 Moiyorumokau lao i posusaa iti. Iko, bara

maniNa lao, lawi bara mani hawe tempoKu." 9 Nodomi lolitana Yesu i halaluNa, hai maida liliu mani i Galilea. 10 Lao mpuumohe halaluna Yesu i Yerusale bona moula Posusa Pobambaru. Kalaonda iti, meula ngkandii Yesu haduduaNa, bona dati raisa tauna bosa. 11 I posusaa iti, tadulakonda to Yahudi mohaoki liliu Yesu, rauli: "Iumbami Ia?" 12 Hai tauna bosa wori, mombekakanenimohe. Arahe au manguli: "Tauna au maroa mpuu Ia." Hantanga wori manguli: "Bara! Ia mopakanawo pea tauna bosa!" 13 Agayana bara hadua au bai mololita i katongawana, lawi mampokalangahe tadulakonda to Yahudi. 14 I tanga mposusa iti, Yesu mesua i lalu Souna Pue Ala, hai Napepongkami mepaturo. 15 Tingkarahe to Yahudi mohadi paturoNa, rauli: "Noumba pane Naisa ope-ope au teuki i lalu Sura Malelaha, lawi Ia bara toposikola?" 16 Nauliangahe Yesu: "Au Kupaturoakau, paturo hangko i Pue Ala au motuduNa, bara paturoNgku haduduaNgku. 17 Hema au mampeinao mobabehi peundeana Pue Ala ina raisa kahangko iumbana paturoNgku ide, ba hangko i Pue Ala mpuuri ba lolitaNgku pea haduduaNgku. 18 Ane keKupahawe paturoNgku haduduaNgku, manoto mampopetoya peaNa. Agayana ane Kupeinao mobila Pue Ala au motuduNa, lempona, tauna au manotoNa, barana mepodongkoa. 19 Nabi Musa hangkoya moweikau Aturana Pue Ala. Agayana barakau ara hadua au mampeulai Atura iti. Moapa hai nipeinao mopapateNa?" 20 Rauli tauna bosa: "MagilaKo! Hema pae au mampeinao mopapateKo?" 21 Nauli Yesu: "Tingkaramokau, lawi mopakaohaNa tauna i alo penombaa. 22 Agayana ikamu wori mobago i alo penombaa ane mobabehikau ada petile. Nabi Musa hangkoya motudukau motile anami. (Agayana katouana ada petile iti hangko i toiyorunta au moiyoru hangko i Musa, bara hangko i Musa haduduana.) Ane ara anami au hangangaa ratile i alo penombaa, batena mpuu nitile. 23 Mewali, ane metilekau i alo penombaa datikau moliungi Aturana Musa, moapari hai nikarumpuiNa ane mopakaohaNa tauna i alo penombaa bona humalele watana maroa? 24 Ineekau mosalai rangami moula pea apa au niita, agayana hangangaa nibotusi i kanoto-notoana." 25 Karahadina ampu boea Yerusale lolitana Yesu iti, wulimohe. Arahe au manguli: "Ba tauna itimi au rahaoki tadulakonta bona rapapate? 26 Moleri olouto mepaturo hai bara ara

kalangaNa, hai bara ara au mokambaroa. Ba tadulakonta moisa kalana Datu Topehompō? 27 Agayana bara hintoto kalana Datu Topehompō, lawi taise kahangko iumbaNa mai. Ane hawe mpuu Datu Topehompō au radandi hangkoya, bara ara au ina moisa kahangko iumbaNa mai." 28 Mewali, tangana Yesu mepaturo i lalu Souna Pue Ala, mololitami masisimbuku, Nauli: "Niuli niisato kahemaNgku hai kahangko iumbaKu. BaraNa mai moula peundeanaKu haduduaNgku. MaiNa moula peundeana Pue Ala au motuduNa. Iami au hintoto rapoinalai. Agayana ikamu, Ia bara niisa. 29 Iko, Kuisa lawi hangko Iria kamaiNgku, hai Ia au motuduNa." 30 I tempo iti, arahe au mampetandaka mohaka, agayana bara ara au toa tayenda Iria, lawi bara mani hawe tempoNa. 31 Agayana arahe bosa tauna i olonda au mepoinalai Iria, rauli: "Datu Topehompō mpuu, lawi ngkayami tanda kuasa au Nababehi." 32 Arahe to Parisi au mohadi pombekakaneninda tauna bosa mololita kana i Yesu. Ido hai to Parisi hai kapala-kapala tadulako menomba motudumohe bahangkia topokampai Souna Pue Ala lao mohaka. 33 I tempo iti, Yesu mopaturo tauna bosa, Nauliangahe: "BarapoNa mahae hihimbela hai ikamu, ina mesuleNa lao Iria au motuduNa. 34 Ina nihaokiNa, agayana barapoNa nilambi. Hai i kalaoaNgku barakau peisa lao." 35 Wulimohe to Yahudi mohadi lolitana, hai mombekune-kunemohe, rauli: "Iumba ina lao pane Nauli barapi talambi? Ba lao i tampo ntanina maida hihimbela hai to Yahudi au mampogaloahe to Yunani bona mopaguruhe to Yunani inditi? 36 Hai apa lempona lolitana au manguli, ina tahaoki agayana bara talambi, hai barake peisa lao i kalaoana?" 37 Alo kahopoana posusa iti iami alo au meliu karapomahilena. I alo iti, meangkami Yesu lao i lalu Souna Pue Ala, hai mololita masisimbuku: "Hema au mangkadou, maimokau maenu Iriko! 38 Mepoinalaimokau Iriko bona tepabukei irikamu apa au teuki i lalu Sura Malelaha au manguli: hangko i lalunda, moilimi owai ngkatuwo." 39 Au natunggai lolitana Yesu iami Inao Malelaha, au ina mendaulu i tauna au mepoinalai Iria. I tempona Yesu mololita nodo, Inao Malelaha bara mani mendaulu i topeulana, lawi Yesu bara mani rapomahile. 40 Bosa tauna mohadi lolitana Yesu, hai arahe hantanga au manguli: "Ia mpuumi nabi au nadandi Pue Ala hangkoya." 41 Hantanga worihe manguli: "Ia idemi Datu

Topehomp!" Agayana ara worihe au manguli: "Ae! Iami to Galilea! Bara hintoto Datu Topehomp mesupa hangko i Galilea. 42 Lawi i lalu Sura Malelaha teuki: Datu Topehomp iami pemuleana Datu Daudi au hangko i boea Beteleme, boea pesupaana Daudi." 43 Ido hai mombehaimohe tauna bosa: hantangahe mepoinalai i Yesu, hantangahe bara. 44 Arahe au mampeinao mohaka, agayana bara ara au toa tayenda Iria. 45 Topokampai Souna Pue Ala au ratudu mohaka Yesu mesulemohe lao i to Parisi hai kapala-kapala tadulako menomba. Barahe mewali mohaka Ia. Mekunehe tadulako iti irihira, rauli: "Moapari hai bara nihaka hai nianti mai?" 46 Rahanai: "Lawi bara mani ara kihadi tauna mololita au nodo Ia!" 47 Mehanahe to Parisi iti: "Ba Naakalangi worimokau? 48 Peita pae, bara ara hadua tadulako ba to Parisi au mepoinalai i Yesu. 49 Batena pea tauna bosa au mepoinalai Iria, lawi barahe moisa Aturana Musa. Hararamohe!" 50 Roo indo, mololita worimi hadua to Parisi au rahanga Nikodemus. Nikodemus iti, hambelami mampombelambia Yesu. Nauli Nikodemus i hangka rangana: 51 "Moula aturanta, barake peisa mohuku hadua tauna ane bara mani rahadi notona hai raparesa babehiana." 52 Mehanahe rangana, rauli: "Nodoko to Galilea! Nuwile hai nuparesa i lalu Sura Malelaha. Bara ara nabi au mesupa hangko i Galilea." 53 Roo indo, mesulemohe hadua-hadua lao i sounda.

8:1 Agayana Yesu laomi i Bulu Saitun. 2 Kahalona madondo-dondo, lao mbulimi i Souna Pue Ala. Maimohe tauna bosa mohungkuki, hai Ia mohuda mopaguruhe. 3 TangaNa Yesu mepaturo, guru agama hai to Parisi hawemohe moanti hadua towawine au ralambi tangana mebualosi, rapopeangka i olonda tauna bosa. 4 Rauliangaa Yesu: "Guru, towawine ide ralambi tonto tangana mebualosi! 5 I lalu Aturana Musa, ara parenta au manguli: towawine au mobabehi nodo hangangaa rawatui duuna mate. Mewali Oyo, noumba pobotusiMu?" 6 Tunggaiana pampekunenda iti, mohaoki kanawoana lolitana Yesu bona rasalai. Agayana Yesu, bara mehana. Motumpa pea hai mouki i tampo hai karaweNa. 7 Mekune liliuhe Iria, ido hai mengoami Yesu, Nauliangaahe: "Hema irikamu au bara madosa, iami au iyoru mowatui towawine iti!" 8 Roo indo, motumpa

mbulimi, hai mouki liliu i tampo hai karaweNa. 9 Karahadina tadulako to Yahudi lolitana Yesu iti, padu ngkandiimohe hadua-hadua, meponga hangko i tosae duuna hawe i au mangura. Kahopoana, padumohe ope-ope, Yesu pearai au ara inditi hai towawine iti. 10 Roo indo, Yesu mengoami hai mouliangaa towawine iti: "Iumbamohe tauna au mosalaiko inona? Bara pae ara au mampeinao mani mohukuko?" 11 Nahanai towawine iti: "Barapohe ara, Pue." Nauli Yesu: "Iko wori, barako Kuhuku. Mewali, mesulemoko, hai ineemoko mobabehi dosa." 12 Roo indo, mololita mbulimi Yesu i to Yahudi, Nauli: "Iko idemi pewangka au mopamabaa laluna manusia i humalele dunia. Tauna au moulaNa, barahe molumao i lalu kakaindiana. Batena molambihe kamabaa au mopaara katuwo." 13 Rauli to Parisi: "Bara tou lolitaMu, lawi Nupakanoto pea wataMu haduduaMu." 14 Nauli Yesu: "Nauri mololitaNa kana i wataNgku haduduaNgku, batena tou lolitaNgku, lawi Kuisa kahangko iumbaKu mai hai Kuisa iumba kalaoaNgku. Agayana ikamu, bara niisa. 15 Ikamu mebotusi moula pea pekiri manusia. Iko, barana mampohuda-hudaa kara-karanda ba hema pea. 16 Ane rapana, mampohuda-hudaaNa kara-karanda tauna, pobotusiNgku batena manoto, lawi bara haduduaNgku. UmaNgku au motuduNa, Iami au mamporangaiNa. 17 I lalu Sura Aturami ara teuki node: 'Ane ara rodua sabi au himbela lolitanda, posabinda iti peisa rapoinalai.' 18 Ara rodua sabiNgku: Iko haduduaNgku, hai karoduana UmaNgku au motuduNa." 19 Rapekune to Parisi: "Iumba UmaMu?" Mehana Yesu: "Barana niisa, ido hai bara wori niisa UmaNgku. Ane rapana niisa mpuuNa, keniisa wori UmaNgku." 20 Ope-ope iti napahawe Yesu tangana mepaturo i lalu Souna Pue Ala hungku i peti pambolia doi popenomba. Bara mani mpuu rahaka, lawi bara mani hawe tempoNa. 21 Nauli mbuli Yesu i tadulakonda to Yahudi: "Ina paduNa, hai ina nihaokiNa, agayana ina matekau lawi madosa liliu manikau. I kalaoaNgku barakau peisa lao." 22 Karahadina tadulakonda to Yahudi lolitana, mololitamohu hadua hai hadua, rauli: "Apa lempona lolitana inona? Ba mampeinaori menoo, pane Nauli barake peisa lao i kalaoana." 23 Nauliangaahe Yesu: "Ikamu hangko i woi, Iko hangko i wongko. Ikamu hangko i dunia ide, Iko barana hangko i dunia ide. 24 Ido

hai Kuuliangaakau, ina matekau lawi madosa liliu manikau. Ane bara nipoinalai lolitaNgku au mopakanoto kahemaNgku, batena mpuukau mate lawi madosa liliu manikau." 25 Rapekune: "Katou-touana, hema mpuuKo?" Mehana Yesu: "Roomokau Kuuliangaa hangko i nguru-nguruna! 26 Ngkaya mani au ina Kuuli mosalaikau. Agayana Ia au motuduNa, hintoto mpuu rapoinalai, hai apa au Kuhadi hangko Iria, itimi au Kupahawe irikamu i dunia." 27 Au natunggai Yesu iami UmaNa, agayana bara raisa lempona. 28 Ido hai Nauliangaa mbulihe: "Ane nipaiwongkoNa, Iko Ana Manusia, hangko niisari kahemaNgku. Bara ara hampaka au Kubabehi moula peundeaku. Batena pea Kuuli apa au NapaturoaNa UmaNgku. 29 Iami au motuduNa hai au mamporangai liliuNa. BaraNa Napogiangaa haduduaNgku, lawi Kubabehi liliu apa au mopakatana laluNa." 30 Tangana Yesu mopahawe ope-ope iti, bosa to Yahudi mepoinalai Iria. Mewali, Nauliangaahe: "Ane nipeulai liliu paturoNgku, ikamu ina mewali mpuu topeulaNgku, 32 hai ane topeulaNgkumokau, ina niisa mpuu paturo au tou, alana tekabahakau." 33 Mehanahe, rauli: "Ikami ide, pemuleana Burahima! Barangkai hambela rapohawi. Moapari hai Nuuli ina tekabahangkai?" 34 Nauli Yesu: "Tou mpuu lolitaNgku ide: ope-ope tauna au mobabehi dosa, napohawihe dosa. 35 Ane hawi, bara manoto kamaidana liliu i souna ampuna. Agayana ane anana ampuna, manoto kamaidana liliu i souna umana. 36 Mewali, ane Iko mokabahakau hangko i dosami, tekabaha mpuumokau, lawi Iko AnanaNa Pue Ala. 37 Kuisa kaikamuna pemuleana Burahima. Agayana arakau au mampeinao mopapateNa, lawi bara nipailalu lolitaNgku. 38 Apa au kuita i lindona UmaNgku, itimi au Kuuliangaakau. Agayana ikamu mobabehi apa au napaturoakau umami." 39 Rauli to Yahudi: "Umangki iami Burahima!" Nauli Yesu: "Ane tou-tou ananakau Burahima, moapa hai bara nipeulai babehiana? 40 Kupahawekau paturo au tou au Kutarima hangko i Pue Ala, agayana nipeinao pea mopapateNa! Ane Burahima, bara nodo babehiana. 41 Babehiami iti batena moula babehiana umami!" Rahanai to Yahudi: "Agayana ikami, barangkai ana i tampo! Umangki hadua pea, Iami Pue Ala." 42 Nauli Yesu: "Ane tou-tou mpuu Pue Ala Umami, kenipokaahiNa, lawi Iko hangko i Pue AlaNa mai, hai Ikomi au Naposuro.

BaraNa mai moula peundeaKu haduduaNgku. MaiNa moula peundeana Pue Ala, lawi Ia au motuduNa. 43 Bara mpuu niisa lempona lolitaNgku, lawi bara nibuku mampehadingi paturuNgku. 44 Umami iami Datu Tokadake! Hai nipeinao moula liliu peundeana umami iti. Hangko i nguru-nguruna iami topepapate. Paturona bara nodo paturu au tou, lawi bara ara au tou iria. Ane modongko, moula pea poantina, lawi ia topodongko mpuu, hai ope-ope tauna au modongko mampeulai peundena. 45 Mewali, ido hai BaraNa nipoinalai, lawi Kuuli apa au tou. 46 Hemakau au peisa motudungia kaarana dosaNgku? Ane Kuuli apa au tou, moapari hai BaraNa nipoinalai? 47 Taunana Pue Ala mounde mampehadingi lolitana Pue Ala. Agayana ikamu, bara niunde mohadi lolitaNgku, lawi barakau hangko i Pue Ala." 48 Rauli to Yahudi: "Tou mpuu au kiuli! HimbelaKo to Samaria au napesawii seta." 49 Nauli Yesu: "BaraNa napesawii seta. Iko mobilaNa UmaNgku. Agayana ikamu, BaraNa nibila. 50 BaraNa mampopetoya. Naunde Pue Ala bona rapomahileNa, hai Iami au mebotusi. 51 Tou mpuu lolitaNgku ide: hema au mampeulai lolitaNgku, barahe mate, tuwohe duuna kamahae-haea." 52 Rauli to Yahudi: "Ide-ide kiisa mpuu kanapesawiiMu! Burahima, matemisi. Nodo wori ope-ope nabi hangkoya, matemisi. Agayana Nuuliri hema au mampeulai lolitaMu barahe mate. 53 Ba Nuuli meliu kamahilena tuwoMu hangko i toiyorunta Burahima au mahaemi mate? Ba meliu kamahilena tuwoMu hangko i ope-ope nabi au matehe? HemariKo pane Nuuli nodo?" 54 Nauli Yesu: "Ane mengkaiwongkoNa, bara ara pobunduana. Agayana UmaNgku au mopaiwongkoNa. Niuli kalana Pue Ala au nipenombai. 55 Agayana katouana bara niisa Pue Ala. Ane Iko, Kuisa. Ane keKuuli bara Kuisa Ia, modongkoNa nodo ikamu. Agayana Kuisa mpuu, ido hai Kupeulai lolitaNa. 56 Ane toiyorumi Burahima, matana laluna lawi naisa kaina naitaNgku i alo kahaweNgku. Ia moitami kahaweNgku hai matana mpuu." 57 Rauli to Yahudi: "TinuwuMu, bara mani handa lima pulona parena. Nuitami pae ido Burahima?" 58 Nauli Yesu: "Tou mpuu lolitaNgku ide: hangko damani Burahima mesupa, Iko ara amimoNa!" 59 Karahadina to Yahudi lolitaNa iti, motimamohe watu rapeinao mowatui duuna mate. Agayana Yesu padu ngkandii hangko i Souna Pue Ala hai

barapi raita.

9:1 Tangana Yesu molumao, moitami hadua tauna au bilo hangko i karapoanakana. 2 TopeguruNa mekune Iria: "Guru, moapa hai bilo hangko i karapoanakana? Ba anti dosana haduduana, ba anti dosanda tosaena?" 3 Mehanami Yesu, Nauli: "Bara dosana haduduana, hai bara wori dosanda tosaena. Ide mewali bona tongawa kuasana Pue Ala iria. 4 Tempona mani mabaa, hangangaa tapopolumao bagona Pue Ala au motuduNa. Lawi ina hawe tempo makaindi, hai ane makaindi, barapi ara tauna au peisa mobago. 5 TangaNgku mani i dunia, Ikomi ide pewangka au mopamabaa laluna manusia i humalele dunia." 6 Karoona Yesu mololita nodo, motinudumi i tampo. TinuduNa Nagalo hai tampo bona mewali reta, pane Napoporirohi matana tobilo iti. 7 Roo indo, Nauliangaa: "Laomoko mewawalindo i Wuhu Siloam." ("Siloam" iti, lempona "Ratudu.") Lao mpuumi mewawalindo, hai i pesulena, meitami. 8 Hangko inditi, hintonggina hai tauna au biasa moita ia merapi-rapi, mombekune-kunehe, rauli: "Hemari olou? Bara pae ia tobilo au biasa mohuda merapi-rapi?" 9 Ara au manguli: "Iami diti!" Ara hantanga wori au manguli: "Bara. Kahalengge-lenggeana pea." Agayana ia manguli: "Ikomi dide!" 10 Mewali, rapekune: "Noumba pane peisako meita?" 11 Nauliangahe: "Tauna au rahanga Yesu mobabehi reta, Napoporirohi matanku, pane Nauliangaana: 'Laoko mewawalindo i Wuhu Siloam.' Lao mpuumona mewawalindo, hangko inditi meitamona!" 12 Rapekune: "Iumbami tauna iti?" Nauliangahe: "Bara kuisa." 13 Ope-ope iti mewali i alo Satu, alo penombaanda to Yahudi. I tempo iti, Yesu mogalo walenguNa hai tampo, hai mopakaoha tobilo iti. Mewali, tobilo au meita iti raanti lao i to Parisi. 15 To Parisi mekune wori iria, rauli: "Noumba hai pane peisako meita?" Nauliangahe: "Ia morirohi matanku hai reta, hai mewawalindona, pane meitana." 16 Bahangkiahe to Parisi manguli: "Ane nodo, tauna iti bara hangko i Pue Ala, lawi bara mampeulai palianta i alo penombaa." Agayana au hantanga manguli: "Ane tomadosa, hangko iumbari kuasana mobabehi ngkaya tanda kuasa au nodo?" Ido hai mombehanaimohe hadua hai hadua. 17 Hangko inditi, mekune mbulimohe to Parisi i tobilo iti, rauli: "Ane oyo,

apa au nuuli, lawi Ia mopakaoha matamu." Nauli tobilo iti: "Manoto Ia hadua nabi." 18 Agayana tadulakonda to Yahudi barahe mampoinalai kaiana mpuumi tauna au bilo hangkoya hai unga pea meita. Ido hai rakakio inana hai umana bona mampohidupaahe, 19 hai rapekune: "Ba tou mpuu tauna ide anami? Ba iami au bilo hangko i karapoanakana? Noumba hai pane peisa meita?" 20 Rauli inana hai umana: "Au kiisa, ide mpuumi anangki au bilo hangko i karapoanakana. 21 Agayana noumba rarana pane peisa meita, bara wokamia kiisa. Hai hema au mopakaoha, bara wori kiisa. Ia mahilemi. Nipekune rai iria. Ia peisa mohanai pampekunemi." 22 Inana hai umana manguli nodo, lawi langahe i tadulakonda to Yahudi. Lawi arami kabotuana hawanda tadulako iti au node: hema-hema au mouli ka Yesuna Datu Topehompou, barapohe rapaliu mesua i sou penombaa. 23 Idomi pongkana pane tosaena manguli: "Ia mahilemi. Nipekune pearai iria." 24 Roo indo, rakakio mbuli tauna au bilo iti, hai rauliangaa: "Nuuli mpuu apa au tou i lindona Pue Ala! Kiisa Yesu iti iami tauna au madosa." 25 Nauliangaahe: "Iko, bara kuisa ba tomadosa ba bara. Au kuisa pea, bilona hangkoya, agayana ide-ide meitamona." 26 Hangko inditi, rapekune mbuli: "Apa au Nababehiako? Noumba raraNa mopakaohako?" 27 Nahanaihe: "Roomokau kutuntua inona, bara pae nihadi? Moapari pane mekune liliukau iriko? Ba nipeinao wori mewali topeguruNa?" 28 Hangko inditi, ratatarahumi hai rauliangaa: "Oyo topeguruNa tauna iti! Ikami topeguruna nabi Musa! 29 Manoto kiisa Pue Ala mopahawe lolitaNa i Musa hangkoya. Agayana Yesu iti, bara kiisa kahangko iumbaNa mai." 30 Mehana tobilo iti: "Mepawuli mpuukau! Niuli bara niisa kahangko iumbaNa, moleri Napakaoha matangku! 31 Taisa Pue Ala bara mohanai pamperapina tauna au madosa, agayana Ia mampehadingi pamperapina tauna au mengkoru Iria hai au mampeulai hawaNa. 32 Hangko i pewaliana dunia, bara mani hambela tahadi tuntukana tauna au bilo hangko i karapoanakana au peisa rapakaoha. 33 Ane Yesu bara hangko i Pue Ala, manoto bara peisa mobabehi apa-apa." 34 Rahanai tadulakonda to Yahudi iti: "Oyomi buke dosa hangko i karapoanakamu. Moapari pane baiko mopaturongkai?" Meponga inditi, ia rapopeloho hangko i sou penombaa hai barapi rapaliu mesua. 35 Nahadi Yesu karapopelohona hangko i sou

penombaa. Ido hai laomi Napombelambia, Nauliangaa: "Ba mepoinalaiko i Ana Manusia?" 36 Nauli tauna iti: "Nuuliangaana kahemana, bona mepoinalaina Iria." 37 Nauli Yesu: "Nuitami! Iami au tangaNa mololita irio." 38 Nauli tauna iti: "KupoinalaiKo, Pue!" hai molingkudumi menomba Iria. 39 Nauli Yesu: "KamaiNgku i dunia ide, maiNa mobotusi kara-karanda tauna, bona tauna au bilo peisa meita, hai tauna au meita ina mewali bilo." 40 Arahe bahangkia to Parisi inditi au mohadi lolitana Yesu, rauliangaa: "Ba Nuuli bilo woringkai?" 41 Nauli Yesu: "Ane kebilokau, kebara ina niisa apa au tou, hai barakau madosa. Agayana, lawi niuli meita mpuukau, batena madosakau."

10:1 Nauli Yesu: "Tou mpuu lolitaNgku ide: ane ara hadua tauna au mengkahe i wala bona mesua i lalu gimpu hai bara moliu i babaka, tauna iti iami topanangka hai tokadake. 2 Ane toporewu, ia mesua moliu i babaka. 3 Topokampai gimpu mobungkahia babaka, hai dimbana moisa mampekatandai wotuna. Toporewu iti mokakio hanganda hambaa-hambaa hai moantihe lao i raoa. 4 Kanaantinda ope-ope dimbana lao i raoa, moyorumi hangko irihira, hai dimbana meula iria, lawi raisa mampekatandai wotuna. 5 Barahe moula tauna ntanina. Ane ara tauna au bara toporewunda au mokakiohe, rapelohoa, lawi barahe moisa wotuna." 6 Yesu mopahawe lolita iti i to Parisi, agayana barahe moisa lempoNa. 7 Ido hai Nauli mbulimi: "Tou mpuu lolitaNgku ide: Ikomi ide peisa rapandiri nodo babaka au rapoliungi dimba mesua i lalu gimpu. 8 Ope-ope tauna au moyoru hangko Iriko au mouli kaihirana toporewo au maroa, topanangka hai tokadakehe. Agayana dimbaKu, barahe meula i pekakionda. 9 Ikomi ide babaka. Hema au mesua moliu Iriko, molambihe katuwo maroa. Ihira peisa rapandiri nodo dimba au mesua i lalu gimpu hai mesuwu lao i raoa molambi hehi au marudu. 10 Ane tauna ntanina au mouli kaihirana Datu Topehempo, ihira peisa rapandiri nodo topanangka. Tunggaiana topanangka, mampeinao manangka, mepapate hai mepakarugi. Agayana kamaiNgku ide bona manusia molambi katuwo au rumihi kamaroana. 11 Ikomi ide toporewu au maroa. TuwoNgku Kuwei bona dimbaKu tuwohe. 12 Ane ara hadua tauna au rasaro pea, bara maroa

pamporewuna, lawi bara ia ampu dimba. Ane moita serigala mai, melangka mopalehi dimba iti. Mewali dimba iti nahaka serigala, alanda mahawu. 13 Tauna au rasaro iti melangka, lawi ia mobago bona molambi pea sarona. Bara mampekiri dimba iti. 14 Ikomi ide toporewu au maroa. Nodo UmaNgku moisaNa hai Iko moisa UmaNgku, nodo wori Iko moisa dimbaKu, hai dimbaKu moisaNa. TuwoNgku Kuwei bona dimbaKu tuwohe. 16 Ara mani dimbaKu au ntanina, agayana barahe ara i lalu gimpu ide. Ihira wori, hangangaa Kuantihe mai. Ina moisa mpuuhe wotuNgku, hai ope-ope dimbaKu ina mewali peahe hantobu. Iko haduduaNgku au mamporewuhe ope-ope. 17 UmaNgku mampokakayaNa, lawi Kuhuhu tuwoNgku bona tuwo huleNa. 18 Bara ara hadua au mopapateNa ane bara peundeaKu. Kuunde mokira wataNgku moula peundeaKu haduduaNgku. Ara kuasaNgku mokira wataNgku bona rapapate, hai ara wori kuasaNgku tuwo hule. Itimi hawana UmaNgku au Kutarima hangko Iria." 19 Karahadina to Yahudi pololitana Yesu, mombehanai mbulimohe. 20 Bosahe au manguli: "Napesawii wei seta hai magila! Barapi paraluu tapehadingi lolitaNa." 21 Agayana ara wori au manguli: "Bara! Tauna au napesuangi seta bara mololita nodo. Ara pae seta au mopakaoha tauna au bilo?" 22 I tempo iti i Yerusale, tauna mopaarahe susa mokatuinao Alo Popamalelaha Souna Pue Ala hangkoya. I tempo iti, tempo makuli. 23 Yesu molumaomi i Souna Pue Ala i tarampa au rahanga Tarampa Salomo. 24 Tadulakonda to Yahudi motolelikimi Yesu, rauliangaa: "Moapa hai Nupogiangaa liliungkai wuli? Barangkai Nupakanotoa kahemaMu. Ane Datu TopehompompuuKo, Nupakanotoamongkai." 25 Nauli Yesu: "Roomokau Kuuliangaa, agayana bara nipoinalai. Tanda kuasa au Kubabehi hai kuasana UmaNgku, itimi au mopakanoto kahemaNgku. 26 Agayana bara liliu nipoinalai, lawi barakau dimbaKu. 27 DimbaKu moisa wotuNgku. Kuisa mpuuhe, hai raulaNa. 28 Kuweihe katuwo maroa au bara mokahopoa, hai manoto kadanda ina rahuku i naraka. Bara ara hadua au peisa mamperampaihe hangko Iriko. 29 Meliu kuasaNa UmaNgku hangko i ope-opena, hai Iami au moweiNa dimbaKu. Bara ara hadua au peisa mamperampaihe hangko i UmaNgku. 30 Iko hai UmaNgku, hadua peaNgkai." 31 Hangko inditi, to Yahudi motimamohe watu, rapeinao

mowatui Yesu duuna mate. 32 Nauliangahe Yesu: "Niita mpuuNa mobabehi bago au maroa moula hawana UmaNgku. Hangko i ope-ope bagoNgku iti, umba au mewali pongkana pane nipeinao mopapateNa?" 33 Rauli to Yahudi: "Barari anti bagoMu au maroa pane ina kipapateKo, agayana anti popakoiMuri Pue Ala! Manusia biasa peaKo, agayana Nuuliri Pue AlaKo!" 34 Nauli Yesu: "I lalu Sura Aturami, teukimi lolitana Pue Ala i to Yahudi hangkoya au manguli node: 'pue alakau.' 35 Apa au teuki i lalu Sura Malelaha iti, bara ara katebaliana. Mewali, ane Sura Malelaha manguli 'pue alakau' i tauna au motarima Ngkorana Pue Ala hangkoya, pelumbunami Iko. 36 Lawi Iko ide au napilei UmaNgku au motuduNa mai i dunia. Mewali, moapari hai niuli kaKupakoina Pue Ala ane Kuuli kaIkona AnaNa? 37 Ane bara Kubabehi bago au hangko i UmaNgku, ineeNa nipoinalai. 38 Agayana ane Kubabehi bago au hangko i UmaNgku, hangangaa nipoinalaiNa anti pobagoNgku iti. KehapiriNa bara nipoinalai, bagoNgku hangangaa nipoinalai. Ane nipoinalai pobagoNgku, ina niisa mpuu i lalumi: mohintuwuNa hai UmaNgku, hai UmaNgku mohintuwu hai Iko." 39 Karahadina to Yahudi lolitana Yesu, rapetandaka mbulimi mohaka, agayana tekabaha pea hangko i tayenda. 40 Hangko indo, meangka mbulimi Yesu lao i tanda orupena owai Yarade i periuana Yohane hangkoya, hai maida inditi. 41 Bosa tauna laohe mampohidupaa. Rauli tauna iti: "Yohane bara mobabehi tanda kuasa. Agayana ope-ope au napahawe kana i Yesu mewali hahami." 42 Ido hai bosa tauna inditi mepoinalai i Yesu.

11:1 Hadua tobalilo au rahanga Lasaru maida i boea Betania hihimbela hai halaluna Maria hai Marta. (Maria itimi au ina mobumbuha lana wongi i bitina Yesu hai naumpahi hai weluana.) Hambela tempo, Lasaru mahai. 3 Halaluna au rodua motudumohe tauna lao i Yesu mouliangaa: "Pue, rangaMu au Nupokaahi, tangana mahai." 4 Kanahadina Yesu bambari iti, Nauli: "Hakina iti bara ina moanti mate. Iti mewali bona Pue Ala rapomahile, hai Iko AnaNa rapomahile." 5 Yesu mampokakaya Marta, Maria, hai Lasaru. 6 Agayana kaNahadina kamahaina Lasaru, bara kasaliu lao, liliu pea i paidaana rongalo kamahaena. 7 Liumi rongalo, hangko

Nauliangaarihe topeguruNa: "Aginami mesulemoke lao i tampo Yudea." 8
Rauli topeguruNa: "Guru, bara mani mahae to Yahudi inditi mampeinao
mowatuiko duuna mateKo. Moapari hai Nupeinao mbuli lao indolou?" 9
Nauliangaahē Yesu: "I lalu hangalōa, bara pae hampulo hai rojaa? Tauna
au molumao mabaa, barahe tehube. Peisahe meita, lawi ara pewangka alo
au mopamabaa dunia ide. 10 Agayana tauna au molumao kaindi, batena
tehubehe, lawi bara ara kamabaana." 11 Nodomi lolitana Yesu, hai roo
indo Nauli mbuli: "Ranganta Lasaru, letami. LaoNa bona Kurua." 12
Katouana lolitana Yesu iti, lempona Lasaru matemī. Agayana topeguruNa
barahe moisa lempona lolitanaNa iti, nabuhu inaonda leta mpuu Lasaru. Ido
hai rauliangaahē: "Pue, ane leta pea, ia ina maoha." 14 Mewali, ia
mobungkahiamohe lempona lolitanaNa, Nauli: "Lasaru matemī. 15
MatanaNa lawi baranaNa ara i tempo kamatena. Lawi apa au mewali, ina
moanti roa ngkatuwo irikamu, bona mepoinalaikau Iriko. Laomoke i
Lasaru." 16 Tomas, au rauli Toporopa, mouliangaahē hangka topeguruna:
"Agina meulake Iria, bona mateke hihimbela hai Ia." Mewali lao
mpuumohe i tampo Yudea. 17 Kahawenda i boea Betania, Yesu mohadi
bambari au manguli ibami alona Lasaru ratawu. 18 Betania iti hungku i
Yerusale, kira-kira talu kilo kakaraona. 19 Mewali, bosahē to Yahudi mai
mopalindo Marta hai Maria i kapatena halalunda. 20 Nahadimi Marta
kaina hawena Yesu, ido hai laomi nadupa. Agayana Maria, i sou liliu pea.
21 Nauli Marta i Yesu: "Pue, ane keindeKo i tempo kamahaina
halalungku, bara ina mate. 22 Agayana nauri nodo, kuisa: apa au Nuperapi
i Pue Ala ide-ide, batena NaweiKo." 23 Nauli Yesu iria: "Halalumu ina
tuwo hule." 24 Nauli Marta: "Io, au kuisa, ina tuwo hule i alo pobotusi
kahopoa dunia, i karapopearonda ope-ope tomate." 25 Nauli Yesu: "Ikomi
ide au mampopearo tomate, hai au mowei katuwo. Tauna au mepoinalai
Iriko, kehapirihe mate, ina tuwo hulehe. 26 Hai ope-ope tauna au molambi
katuwo hangko i pepoinalainda Iriko, batenda bara mate duuna
kamahae-haea. Ba Nupoinalai au Kuuli iti?" 27 Nauli Marta: "Io, Pue,
kupoinalai kaOyona Anana Pue Ala, Datu Topehomo au nadandi Pue Ala
hangkoya au ina mai i dunia." 28 Karoona manguli nodo, laomi i sou
mokakio Maria, hai nakaneni nauliangaahē: "Indolou ara Guru, Napeinao

mampohidupaako!" 29 Kanahadina Maria lolitana, hoholiga mpuumi lao mampohidupaa Yesu. 30 I tempo iti, Yesu bara mani mesua i lalu boea, ara mani i raoa boea i pohidupaanda hai Marta inona. 31 To Yahudi au maihe mepalindo i lalu sou, moitahe Maria hoholiga padu, rauli: "Ia lao i talumba moteria!" Ido hai meula worimohe. 32 Hawemi Maria i pehupeana Yesu inona, ia moitami Yesu hai mai molingkudu i lindoNa, nauliangaa: "Pue, ane keindeKo i tempo iti, bara ina mate halalungku." 33 Yesu moita Maria moteria hai to Yahudi au napohimbela moteria wori, ido hai wiora hai masusa laluNa. 34 Napekunehe: "Iumba ratawu?" Rauli: "Pue, maimoKo lao tapeita." 35 Moteriami Yesu. 36 Rauli to Yahudi: "Peita! Maahi mpuu laluNa i Lasaru!" 37 Agayana ara worihe au manguli: "Tauna au bilo Napakaoha. Moapari pane Ia bara mopakaoha Lasaru dati mate?" 38 Hangko inditi, masusa mbulimi laluna Yesu, hai lao i talumba. Talumba iti, iami kalolu au rakae i tabingke bulu au ratuko hai watu mahile. 39 Nauli Yesu: "Bungkahimi watu petukona iti!" Marta, halaluna tomate iti, manguli: "Pue, ineemi rabungkahi. Bangkami, lawi ibami wengina ratawu." 40 Nauli Yesu i Marta: "Bara pae Kuuliangaamoko inona, ane nupoinalaiNa, ina nuita mpuu kamahilena kuasana Pue Ala?" 41 Roo indo, rabungkahimi watu petuko talumbana. Yesu mengoami i langi, Nauli: "UmaNgku, Kuuli ngkaya kamaroana Irio, lawi Nuhadimi pamperapiKu ide. 42 Kuisa, batena Nuhadi liliu lolitaNgku. Agayana lolitaNgku ide Kuuli masisimbuku, bona rahadi tauna bosa inde, bona rapoinalai kaOyona mpuumi au motuduNa." 43 Roo indo, nauli Yesu masisimbuku: "Lasaru! Mesuwumoko mai!" 44 Mesuwu mpuumi tauna au mate iti hangko i lalu talumbana. Tayena hai bitina tebungkuhi mani hai bana popebungkuhina, hai waana tetolumbungi mani moula ada to Yahudi. Nauliangaahe Yesu: "Bungkahi pebalungkuhina bona maroa polumaona." 45 Bosa to Yahudi au mai mosondaki Maria i tempo ido, moita apa au nababehi Yesu. Hai bosahe au mepoinalai Iria. 46 Agayana ara worihe hantanga au lao i to Parisi mopahaweae apa au nababehi Yesu iti. 47 Ido hai to Parisi hai kapala-kapala tadulako menomba mopaaramohe pogombo mahile hihimbela hai tadulako agama au ntanina, rauli: "Apa au hangangaa tababehi? Lawi ngkaya mpuu tanda kuasa au Nababehi. 48 Ane

tapogianga liliu, ope-ope tauna ina mepoinalaihe Iria. Kahopoana, surodado to Roma ina mai mogero Souna Pue Ala hai ope-ope boeanta." 49 Roo indo, mololitami hadua hangko i olonda au rahanga Kayapas, Tadulako Menomba Mahile i pare iti, nauli: "Bara niisa apa-apa! 50 Bara niisa apa au hangangaa rababehiahe tauna bosa. Agina hadua tauna mate mopahuru ope-ope tauna, dati ina ragero boeanta ope-ope." 51 Lolita iti nawei Pue Ala iria, lawi iami Tadulako Menomba Mahile i pare iti. Nodemi tunggaiana pololitana Kayapas: Yesu hangangaa rapapate. Agayana ara wori lempona au karompakana, au bara naisa, iami kapatena Yesu mopahuru to Yahudi. 52 Hai bara pea to Yahudi. Anti kapatena Yesu iti, ope-ope anana Pue Ala au mahawu-hawu i humalele dunia ina ragulu hai rapahantobuhe. 53 Meponga alo iti, tadulakonda to Yahudi mohawakamohe bona Yesu rapapate. 54 Mewali, ido hai Yesu barapi mampatongawa i olonda to Yahudi, bona datipi raita tauna bosa. Ia padumi hangko inditi lao i boea au rahanga Epraim i wiwi pada wungi. Maidami inditi hihimbela hai topeguruNa. 55 I tempo iti, ina hawe alo mahile agama Yahudi au rauli Alo Posusa Pasa. Hangko damani alo mahile iti, bosa tauna hangko i boea-boeana lao i Yerusale, bona mobahoihe watanda moula ada agamanda. 56 Tauna au mogulu i Yerusale iti liliuhe mohaoki Yesu. Tanganda mogulu i Souna Pue Ala, mombekune-kunehe, rauli: "Noumba pelambiami? Ba Ia ina mai i posusa ide?" 57 Nodomi lolitanda tauna bosa. Ane kapala-kapala tadulako menomba hai to Parisi, ara amimi parentanda i tauna bosa au manguli: "Hema-hemakau au moisa kaiumbana Yesu, hangangaa niuliangaangkai, bona rahaka."

12:1 Ini alona hangko damani alo Posusa Pasa, laomi Yesu i Betania, boea pidaana Lasaru, au Napatuwo hule hangkoya. 2 I kahaweNa, tauna inditi mopaarahe susa, lawi matanahe motarima Yesu i boeanda. Marta morora torare, hai Lasaru ara hihimbela hai Yesu hai tauna ntanina au napohimbela. 3 Tanganda maande, maimi Maria moanti lana wongi habotolo. Lana iti ope-ope rababehi hangko i uaka kau au mawongi, hai masuli mpuu holona. Maria mobumbuhami lana iti i bitina Yesu, hai naumpahi hai weluana. Mawongi humalele lalu sou. 4 Hadua topeguruna

Yesu au rahanga Yudasi Iskariot, au ina mampobalu Yesu i iwaliNa, manguli: 5 "Masuli mpuu holona lana iti, kira-kira talu atuna doi pera. Moapari hai bara rapobalu peami, hai holona raweihe tauna au meahi-ahi?" 6 Katouana, Yudasi bara mampekiri katuwonda tomeahi-ahi, lawi ia topanangka! Ia au mogulu doinda topeguruNa, hai hambela-hambela naala ngkabuni. 7 Nauli Yesu: "Pogiangaamide! Apa au nababehi ide, mopasilolonga amimi wataNgku i karatawuNgku. 8 Ane tauna au meahi-ahi, ara mani katepakami motulungihe. Agayana lko, ina barapi ara katepakami motulungiNa, lawi barapoNa mahae hihimbela hai ikamu." 9 Bosa to Yahudi mohadi kaarana Yesu i Betania, ido hai laomohe mampeita Ia. Hai mampeinao worihe moita Lasaru au napatuwo hule Yesu hangkoya. 10 Indo, kapala-kapala tadulako menomba mogombomohe mampololita tunggaianda mopapate Lasaru. 11 Lawi anti kaiana, bosa to Yahudi mopalehihe hai mepoinalaihe i Yesu. 12 Kahalona, bosa tauna i Yerusale mohadi kamaina Yesu monontohi boeanda. I tempo iti, bosa mpuu tauna moteruhu i Yerusale lawi ina hawe alo Posusa Pasa. 13 Mangalamohe tawengkau au nodo tawe handutu, hai laohe mampohidupaa. Monganga-nganga liliumohe, rauli: "Tetoyami Pue Ala! Pue Ala mowati tauna au mai i lalu hangaNa! Pue Ala mowati Datunda to Israeli!" (Mazmur 118:25-26) 14 Yesu mangalami hambaa ana kalide, Napodara. PesawiNa iti mopabukei lolitana nabi hangkoya au manguli: 15 "Ineekau langa, ampu boea Sion. Peita! Oloumi mai Datumi, mampodara hambaa ana kalide." (Zakharia 9:9) 16 I tempo iti, topeguruNa bara mani moisa apa lempona au mewali iti. Agayana karoona Yesu rapapate hai rapomahile, mokatuinaomohe apa au teuki i lalu Sura Malelaha au mopahawe amimi apa au mewali i Yesu. 17 Ara worihe bosa tauna i Yerusale au hihimbela hai Yesu hangkoya i pokakioNa Lasaru hangko i lalu talumba i kaNapatuwona hule. Tauna iti mololita liliuhe kana apa au mewali. 18 Ido hai pane bosa ntepuumohe tauna lao mampohidupaa Yesu, lawi mohadihe kaIana au mobabehi tanda kuasa iti. 19 Molololitamohe to Parisi, rauli hadua hai hadua: "Manangimoke dide! Peita, ope-ope tauna i dunia meula Iria." 20 Bosa tauna lao i Yerusale menomba i alo Posusa Pasa. I olonda tauna iti, ara worihe bahangkia to Yunani. 21 To Yunani iti

laohe i Pilipu, rauli: "Mampeinao wongkamia mampohidupaa Yesu." (Pilipu iti hangko i boea Betsaida i tampo Galilea.) 22 Laomi Pilipu mopahawe lolitanda i Andaria, hai roo indo, ihira rodua lao mopahawe Yesu. 23 Yesu mouliangaaha: "Hawemi tempona, Iko Ana Manusia rapomahile. 24 Tou mpuu lolitaNgku ide: Iko peisa rapandiri nodo haogu pare. Hangangaa mate hai ratuda i tampo, hangko arari wuana au ngkaya. Ane bara nodo, bara ina mowua. 25 Tauna au mampeulai peundeana haduduana bara molambi katuwo maroa. Agayana tauna au mokabaha peundeana haduduana i dunia ide, ina molambi katuwo maroa au bara mokahopoa. 26 Hema au mampeinao mewali hawiNgku, hangangaa meula Iriko, bona iumba kalaoaNgku, inditi wori ia. Hai hema au mewali hawiNgku ina nabila UmaNgku." 27 "Masusa laluNgku. Bara Kuisa apa au hangangaa Kuuli, lawi napombediingiNa laluNgku. LaluNgku ide mampeinao mekakae node: 'Uma, NukabahaNa wongkoya hangko i kapari au ina morumpaNa ide!' Agayana idomi tunggaiaKu mai i dunia, bona mantodihaNa kapari iti. 28 Uma, pakahilemide hangaMu!" Roo indo, ara hambua wotu hangko i langi au manguli: "Roomi Kupamahile hangaNgku hai ina Kupamahile mbuli." 29 Tauna bosa au mohadi wotu iti, manguli: "Iti pomoni gumpata!" Agayana hantanga manguli: "Bara. Ara malaeka au mololita Iria." 30 Yesu mouliangaaha: "Wotu au nihadi inona, bara Napahawe bona motulungiNa agayana Napahawe bona motulungikau. 31 Ide-ide hawemi tempona Pue Ala hangangaa mampohuda-hudaa ope-ope kanawoa manusia i dunia. Hai hawe worimi tempona Datu Tokadake au mokuasai dunia ide hangangaa ranawo. 32 Agayana Iko, ane rapamapangkaNa i kau mombehape, ina Kuantu ope-ope tauna Iriko." 33 Lolitana Yesu iti mopakanoto noumba kaina rapapateNa. 34 Rauli tauna bosa: "I lalu Aturana Pue Ala kibasa: Datu Topehompou tuwo duuna kamahae-haea. Moapari hai Nuuli Ana Manusia hangangaa rapamapangka i kau mombehape? Hema Ana Manusia iti?" 35 Nauliangaaha Yesu: "Hampalai pea, pewangka au mopamabaakau ide-ide barapi ina ara hihimbela hai ikamu. Molumao liliumokau i lalu kamabaana i tempona pewangka iti ara mani irikamu, bona datikau narumpa kamakaindi. Tauna au molumao i lalu kakaindiana, barahe moisa iumba kalaoanda. 36

Mepoinalaimokau Iriko i tempoKu mani mewangka i olomi, bona mabaa lalumi." Karoona Yesu mopahawe ope-ope iti, padumi hangko inditi, hai barapi mopatongawa wataNa i tauna bosa. 37 Nauri ngkaya tanda kuasa au nababehi Yesu i lindonda to Yahudi, bara manihe mepoinalai Iria. 38 Tepabukeimi lolitana nabi Yesaya hangkoya au manguli: "Pue, barathe ara au mepoinalai i bambari au kiantiahe. Kehapirihe Nupopaitaa kuasaMu, bara manihe mepoinalai." (Yesaya 53:1) 39 Mewali, barathe peisa mepoinalai, lawi ara au nauki nabi Yesaya hangkoya node: 40 "Nauli Pue Ala: 'Kuoakahe Kupabilo, datihe meita. Kupamatua lalunda, bona barathe moisa peundeaKu. Kahopoana barathe mesule Iriko, hai barathe Kuhorema.' " (Yesaya 6:10) 41 Lolita iti napahawe nabi Yesaya hangkoya kana i Yesu, lawi naita amimi kuasaNa. 42 Nauri nodo, ara worihe bosa tadulakonda to Yahudi au mepoinalai i Yesu. Agayana i lalunda pea mepoinalai, lawi mampokalangahe to Parisi; langahe ina barapi rapaliu mesua i sou penombaa. 43 Lawi au rapaiyuru ntepuu iami petoya hangko i manusia, barathe mohaoki petoya au hangko i Pue Ala. 44 Yesu mololita masisimbuku, Nauli: "Tauna au mepoinalai Iriko, bara Iko pea au rapoinalai, mepoinalai womohe i Pue Ala au motuduNa. 45 Tauna au moitaNa, moita worihe Pue Ala au motuduNa. 46 MaiNa i dunia ide mewali pewangka, bona ope-ope tauna au mepoinalai Iriko barapohe maida i lalu kakaindiana. 47 Tauna au mohadi lolitaNgku agayana bara rapeulai, bara Iko au mohukuhe. Lawi tunggaiaKu mai i dunia ide, barana mai mohuku manusia. MaiNa, bona mokabahahe hangko i huku dosanda. 48 Tauna au mosapuakana hai bara motarima lolitaNgku, arami au ina mohukuhe. Lolita au Kupahawe, itimi au ina mohukuhe i alo pobotusi kahopoa dunia. 49 Lawi lolitaNgku bara hangko i peundeaKu haduduaNgku. Kupahawe hai Kupololita apa au naparentaiaNa UmaNgku, lawi Iami au motuduNa mai. 50 Hai Kuisa: hawana iti mopaara katuwo maroa au bara mokahopoa. Mewali, apa au Kuuli ide, batena lolita au napahawe amimoNa UmaNgku."

13:1 Hangalo hangko damani hawe alo Posusa Pasa, Yesu moisa kaina hawena tempoNa mopalehi dunia hai mesule i UmaNa. Ia mampokaahihe

ope-ope tauna au meula Iria, hai batena Napokaahihe duuna i kahopoana. 2 Yesu hai topeguruNa maandehe kaindi. I tempo iti, Datu Tokadake roomi mokalea laluna Yudasi anana Simo Iskariot, bona mampobalu Yesu i iwaliNa. 3 Naisa Yesu kanaweiNa UmaNa ope-ope kuasa Iria. Naisa wori kahangko i Pue AlaNa, hai kaina mesuleNa mbuli i Pue Ala. 4 Ido hai meangkami, mowosui baduNa, hai mangala komo Naweweha i pekoNa. 5 Roo indo, Naalami owai Nakando i loya, pane mepongkami mobahoi bitinda topeguruNa, Naumpahi hai komo au i pekoNa. 6 Hawemi i Simo Peturu, nauli Peturu: "Pue, moapa pane Oyori au mobahoi bitingku?" 7 Nauli Yesu: "Ide-ide, bara mani nuisa apa au Kubabehi. I alo au ina mai, hangko nuisari." 8 Nauli Peturu: "Inee, Pue! Bara hintoto ane Oyo mobahoi bitingku." Nauli Yesu: "Ane barako Kubahoi, bara ara pohintuwumu hai Iko." 9 Nauli Simo Peturu: "Ane nodo Pue, inee bitingku pea agayana tayengku hai waangku wori." 10 Nauli Yesu: "Tauna au roomi mendo, barapi kedai, maitumi humalele watana, barapi paraluu rabahoi mbuli. Batena pea bitina au hangangaa rabahoi mbuli. Ikamu, tebahoimokau, agayana barakau ope-ope." 11 Yesu mololita nodo, lawi Naisa ami kahemana au ina mampobalu wataNa i iwaliNa. Ido hai Nauli: "Tebahoimokau, agayana barakau ope-ope." 12 Karoona Yesu mobahoi bitinda, Napusa hulemi baduNa, hai mohuda, pane Nauliangahe: "Ba niisa apa au hangko Kubabehiakau? 13 NikakioNa Guru hai Pue. Lolitami iti tou mpuu. 14 Iko, Ampumi hai Gurumi, mobagoNa nodo hadua hawi mobahoi bitimi. Mewali, ikamu wori hangangaa mombabahoi mpobitikau. 15 Kupopaitaakau pandiri ide inona, bona nipeulai babehiaNgku. Iko motulungikau, mewali ikamu wori hangangaa motulungi rangami. 16 Tou mpuu lolitaNgku ide: hadua hawi bara meliu karabilana hangko i ampuna. Hadua suro bara meliu karabilana hangko i tauna au metudu. 17 Ane niisa hai nipeulai paturo ide, ina morasikau. 18 Apa au Kuuli inona, barakau nakanai ope-ope. Kuisa ami hema au Kupilei. Agayana hangangaa tepabukei apa au teuki i lalu Sura Malelaha au manguli: 'Hadua tauna au maande hihimbela hai Iko, iami au mewali iwaliNgku.' 19 Ide Kupahaweaa amimokau hangko damani mewali, bona ane mewali, ina nipoinalai kalkona au tuwo hangko au nguru-nguruna. 20 Tou mpuu lolitaNgku ide:

hema au motarima suroNgku, himbelami Iko au natarima. Nodo wori, hema au motarimaNa, himbelami Pue Ala au natarima lawi Iami au motuduNa." 21 Karoona Yesu mololita nodo, wiorami laluna, hai Nauli: "Tou mpuu lolitaNgku ide: hadua hangko irikamu ina mampobaluNa i iwaliNgku." 22 Anti kawulinda topeguruNa, mombetototokimohe lawi bara raisa kahemana au Natunggai. 23 Ara hadua topeguruNa au napokakaya, mohuda i holaNa. 24 Simo Peturu mokampidimi topeguruNa iti, nauliangaa: "Nupekune i Guru, ba hema au Natunggai." 25 Ido hai topeguruNa au mohuda i holaNa Yesu iti mohungkuki Yesu, napekune Iria: "Hema, Pue?" 26 Nauli Yesu: "Hema au Kuwei roti au Kueme i lalu paenua ide, iami taunana." Naalami hantepo roti, Naeme i lalu paenua iti, hai Nawei Yudasi, anana Simo Iskariot. 27 Kanadokona Yudasi roti iti, Datu Tokadake mesuami i laluna. Roo indo, Yesu mouliangaa: "Apa au ina nubabehi, nubabehimi holiga." 28 Ane ranganda au maande hihimbela hai ihira, barahe moisa tunggaiana Yesu mololita nodo i Yudasi. 29 Hantangahe mampehangu Yesu motudu Yudasi lao moholo apa au raparaluu i posusanda, ba mowei doi i tauna au meahi-ahi, lawi Yudasi au mokingki doinda. 30 Kanadokonami Yudasi roti iti, padumi lao i raoa. I tempo iti, kaimidi. 31 Kapaduna Yudasi, naulimi Yesu: "Ide-ide Iko Ana Manusia ina rapomahile. Hai apa au ina mewali Iriko, ina mopakahile wori Pue Ala. 32 Hai ane apa au mewali Iriko mopakahile Pue Ala, Pue Ala ina mopakahile woriNa hai kuasaNa. Au Kuuli ide hangangaa holiga mewali. 33 AnaNgku, barapoNa mahae hihimbela hai ikamu. Ina nihaokiNa, agayana nodo au roomohe Kuuliangaa tadulakonda to Yahudi hangkoya, nodo wori Kuuliangaakau: i kalaoaNgku barakau peisa lao. 34 Kuweikau hawa au wou: mombepokaahimokau. Hangangaa mombepokaahimokau nodo kaKupokaahimi. 35 Ane mombepokaahikau, ope-ope tauna ina moisa kaikamuna topeguruNgku." 36 Napekune Simo Peturu i Yesu: "Pue, iumbaKo ina lao?" Nauli Yesu: "I kalaoaNgku, bara maniko peisa lao. I alo au ina mai, hangko peisaNa nupeulai." 37 Nauli mbuli Peturu: "Pue, moapari hai barana peisa meula Irio ide-ide? Baina mate anti peulangku Irio!" 38 Nauli Yesu: "Ba bai mpuuko mate anti kalkona? Tou mpuu lolitaNgku ide: hangko damani motuturua manu, talumi belana ina

nusapuakaNa."

14:1 Nauli Yesu i topeguruNa: "Inee bata-bata lalumi! Mepoinalaimokau i Pue Ala, hai mepoinalai worikau Iriko. 2 I souna UmaNgku, ngkaya paidaa. LaoNa mopasilolongaakau paidaami. Ane kebara nodo, barakau ina Kuuliangaa. 3 KarooNgku mopasilolonga paidaami, ina mesule mbuliNa maikau moala, hai ina Kuantikau i paidaangku, bona iumba pea kaaraangku inditi worikau hihimbela hai Iko. 4 Niisami iumba rara kalaoangku." 5 Nauli Tomas: "Pue, bara wokamia kiisa iumba kalaoamu. Mewali, noumba kakiisana rarana?" 6 Nauli Yesu: "Ikomi ide rara. Ikomi au manoto, hai Ikomi au moweikau katuwo. Bara ara hadua au peisa hawe i UmaNgku, ane bara meula Iriko. 7 Ane niisaNa, niisa wori UmaNgku. Mepongka ide-ide, niisami hai niitami." 8 Nauli Pilipu: "Pue, Nutudungiangkai UmaMu. Iti pea au kiperapi." 9 Nauli Yesu: "Bara maniNa pae nuisa, Pilipu? Mahaemoke sambela! Hema au moitaNa, moita wori UmaNgku. Mewali, moapari hai nuperapi bona Kutudungiakau UmaNgku? 10 Ba bara mani nupoinalai kalkona au mohintuwu hai UmaNgku hai UmaNgku au mohintuwu hai Iko? Apa au Kuuliangaakau ide, bara Kuuli moula peundeaKu haduduaNgku. UmaNgku au mohintuwu hai Iko, Iami au mobago liliu i lalu katuwoNgku. 11 Nipoinalaimide kalkona au mohintuwu hai UmaNgku hai UmaNgku mohintuwu hai Iko. Kehapiri bara nipoinalai lolitaNgku, hangangaa nipoinalai lawi niitami ope-ope au Kubabehi. 12 Tou mpuu lolitaNgku ide: tauna au mepoinalai Iriko, peisahe mobabehi nodo au Kubabehi, ba melumburi hangko i au Kubabehi, lawi ina laoNa maida hihimbela hai UmaNgku. 13 Mewali, apa au niperapi i lalu hangangku, ina Kuweikau, bona apa au Kubabehi iti mopakahile UmaNgku. 14 Apa pea au niperapi i lalu hangangku, ina Kuweikau." 15 "Ane nipokaahiNa, ina nipeulai hawangku. 16 Ina kuperapi i UmaNgku, bona Naweikau hadua Topetulungi au ntanina, bona Ia mamporangaikau duuna kamahae-haea. 17 Topetulungi iti, iami Inaona Pue Ala au monnikau i paturu au tou. Tauna au bara mepoinalai, barahe peisa motarima Inaona Pue Ala, lawi barahe moita hai bara worihe moisa Ia. Agayana ikamu, niisami, lawi Naporangaikau ide-ide, hai Ia ina maida i

lalumi. 18 Barakau ina Kupalehi nodo ana toilu. Ina mesule mbuliNa irikamu. 19 Hampalai pearai, barapoNa ina raita tauna i dunia. Agayana ikamu, ina niitaNa hai ina tuwokau, lawi Iko tuwo. 20 Ane hawe tempo iti, ina niisa kaIkona au mohintuwu hai UmaNgku, hai ikamu mohintuwu hai Iko, hai Iko mohintuwu hai ikamu. 21 Tauna au motarima hai moula hawaNgku, ihirami au mampokaahiNa. UmaNgku mampokaahi tauna au mampokaahiNa, hai Iko wori mampokaahihe, hai Kupatongawahe wataNgku." 22 Yudasi (agayana bara Yudasi Iskariot) mekune i Yesu: "Pue, moapa hai Nupatongawa wataMu irikami pea, hai bara i ope-ope tauna au i dunia?" 23 Nauli Yesu: "Kupatongawa wataNgku i tauna au mampokaahiNa hai au moula lolitaNgku. Ihirami au napokaahi UmaNgku. UmaNgku hai Iko ina mai i tauna iti hai maidaNgkai hihimbela hai ihira. 24 Tauna au barana mampokaahi, barahе moula lolitaNgku. Lolita au nihadi hangko Iriko, katouana bara hangko Iriko, agayana hangko i UmaNgkuri au motuduNa. 25 Ope-ope ide Kuuliangaamokau i tempoKu mani inde hihimbela hai ikamu. 26 Agayana ane hawe Inao Malelaha, Ia ina mopaturoakau hinangkana, hai Napopaingakau ope-ope au roomi Kuuliangaakau, lawi iami Topetulungi au ina natudu mai UmaNgku mewali pahuru wataNgku. 27 Katinda lalu au Kuwoliakau. Katinda lalu au hangko Iriko au Kuweikau. Au Kuweikau ide, bara nodo au nihumba hangko i dunia. Inee karao inaomi, hai inekau langa. 28 Nihadi lolitaNgku inona au manguli: laoNa, agayana ina mesule mbuliNa irikamu. Ane nipokaahi mpuuNa, hangangaa nipokatana wori kalaoNgku i UmaNgku, lawi meliu kamahilena tuwona UmaNgku hangko Iriko. 29 Ide Kuuliangaa amimokau hangko damani mewali, bona ane mewali, ina nipoinalai. 30 Barapi ngkaya katepakaNgku mololita hai ikamu, lawi ina hawemi Datu Tokadake. Iami au mokuasai dunia ide, agayana bara ara kuasana Iriko. 31 Agayana hinangkana ide hangangaa mewali, bona ope-ope tauna ina moisa kaKupokaahina UmaNgku hai kaKupeulaina liliu ope-ope au NahawaaNa. Padumoke hangko inde."

15:1 Nauli Yesu: "Ikomi ide patoa anggoro au tou, hai UmaNgku iami topokadipura anggoro. 2 Ope-ope daa au tuwo hangko Iriko au bara

mowua, Naingihi. Hai ope-ope daa au tuwo hangko Iriko au mowua, Napakabaa hai Nakadipura, bona tetambai powuana. 3 Ikamu, malelahamokau anti pohadimi lolita au Kuuliangaakau. 4 Mohintuwu liliumokau hai Iko, hai Iko wori ina mohintuwu hai ikamu. Daa au bara mentaka i patoa anggoro, bara mowua. Batena pea daa au mentaka i patoana ina mowua. Nodo wori ikamu: barakau peisa mowua ane barakau mohintuwu liliu hai Iko. 5 Ikomi ide patoa anggoro, hai ikamumi pengana. Tauna au mohintuwu liliu hai Iko, hai Iko mohintuwu hai ihira, rumihi powuanda. Agayana ane mepogaakikau hangko Iriko, barakau peisa mobabehi apa-apa. 6 Hema au bara mohintuwu liliu hai Iko batenda ratende, nodo karatendena daa au rahapeki duuna mewali bangi. Daa iti, ragulu hai ratende i lalu api. 7 Ane mohintuwu liliukau hai Iko hai lolitaNgku nipailalu liliu, niperapimi i Pue Ala ba apa peundeami, hai batena Naweikau. 8 Ane rumihi powuami, UmaNgku rapomahile. Ane nodo nibabehi, topeguruNgku mpuumokau. 9 Nodo UmaNgku mampokaahiNa, Iko wori mampokaahikau. Hangangaa tuwo liliukau i lalu ahiNgku. 10 Iko mampeulaiNa hawana UmaNgku hai tuwo liliuna i lalu ahiNa. Nodo wori, ane nipeulai hawaNgku, ina tuwo liliukau i lalu ahiNgku. 11 Ope-ope ide Kuuliangaakau, bona kamatanangku ara irikamu, hai bona buke kamatanami. 12 Idemi hawaNgku: mombepokaahimokau, nodo kaKupokaahimi. 13 Bara ara ahi au meliu kamahilena hangko i ahina hadua tauna au mohuhu tuwona bona mohorema ranganana. 14 Ranganangkumokau ope-ope, ane nibabehi apa au Kuhawaakau. 15 Barapokau Kuuli hawingku, lawi hadua hawi bara moisa apa au i laluna ampuna. Ide-ide, ranganangku mpuumokau, lawi Kupahaweamokau ope-ope au nauliangaaNa UmaNgku. 16 Bara ikamu au mopileiNa. Ikori au mopileikau. Kutudukau mowua; hai wua pobagomi iti bara ina matanta, ina mobundu duuna kamahae-haea. Mewali, apa au niperapi i UmaNgku i lalu hangangku, batena mpuukau Nawei. 17 Idemi hawaNgku irikamu: mombepokaahimokau!" 18 "Ane rakahihikau tauna au bara mepoinalai Iriko, nikatuinao: Ikomi au iyoru rakahihi. 19 Ane rapana, hamporangaakau hai tauna au bara mepoinalai, batena rapokaahikau, lawi rangandakau. Agayana Kupileimokau hai Kupatanikau

hangko i olonda, alana barapokau raporanga. Ido hai rakahihikau. 20 Nikatuinao apa au Kuuliangaakau inona: hadua hawi bara meliu karabilana hangko i ampuna. Mewali ane Iko rapopeahi-ahi, ikamu wori ina rapopeahi-ahi. Ane arahe tauna au moula lolitaNgku, batenda mampeulai wori lolitami. 21 Ope-ope iti ina rababehiakau anti peulami Iriko lawi barahe moisa Pue Ala au motuduNa. 22 Ane kebaraNa mai mopaturohe, kebara worihe masala. Agayana, lawi mai mpuumoNa mopaturohe, ido hai barapi ara rara mosapuaka kamasalanda. 23 Tauna au mokahihiNa, mokahihi worihe UmaNgku. 24 I olonda tauna bosa, Kubabehi tanda kuasa au bara mani rababehi tauna ntanina. Ane kebara Kubabehi nodo, kebarahe masala. Agayana i karaitana apa au Kubabehi, ihira mokahihi liliuNa, hai UmaNgku rakahihi wori. 25 Agayana batena nodo, bona tepabukei apa au teuki i lalu Sura Aturanda au manguli: 'Nauri bara ara salaNgku, rakahihiNa.' 26 Ina mai Inao Malelaha, lempona: Inao au mesuwu hangko i Pue Ala hai au moninikau i paturo au tou. Iami Topetulungi au ina Kutudu mai irikamu au hangko i UmaNgku. Ane mai, Iami au ina mewali sabiNgku. 27 Hai ikamu wori hangangaa mewali sabiNgku, lawi ikamumi au hihimbela hai Iko hangko i pepongkana bagoNgku i dunia."

16:1 "Ope-ope ide Kuuliangaakau, bona dati tekabaha pepoinalaimi Iriko. 2 Ina rawurakau hangko i sou penombaa. Hai bara iti pea, agayana hambela tempo ane tauna mopapatekau, ina rauli, itimi peundeana Pue Ala. 3 Ope-ope iti ina rababehi irikamu, lawi barahe moisa UmaNgku, hai Iko wori, barana raisa. 4 Kuuliangaakau iti, bona ane mewali, ina nikatuinao apa au roomokau Kuuliangaa." "Ope-ope paturo ide barakau Kuuliangaa hangko i nguru-nguruna, lawi inde maniNa hihimbela hai ikamu. 5 Agayana ide-ide, ina laoNa i UmaNgku au motuduNa, hai barakau ara hadua au mekune Iriko ba iumba kalaoaNgku. 6 Masusa lalumi i kanihadina lolitaNgku inona au mouli kaina laoNgku. 7 Agayana katouana, ina molambikau roa ane laoNa! Lawi ane barana lao, bara ina hawe Topetulungi. Agayana ane laoNa, ina Kutudu hawe irikamu. 8 Ane hawe Inao Malelaha, Iami au ina mopakanoto i manusia kamadosana. Ia

wori ina mopakanoto kamanotoNgku hai pehukuna Pue Ala. 9 Ia ina mopakanoto kamadosanda tauna, lawi barahe mepoinalai Iriko. 10 Ia ina mopakanoto kamanotoNgku, lawi ina laoNa i UmaNgku, hai barapoNa niita. 11 Hai Ia ina mopakanoto wori kanahukunda Pue Ala tauna au madosa, lawi Datu Tokadake au mokuasai dunia ide rahukumi. 12 Ngkaya mani au Kupeinao Kuuliangaakau, agayana ide-ide bara mani nibuku motarima ope-ope. 13 Ane hawe Inao Malelaha, Iami au ina moninikau hai mampopaisaakau ope-ope paturu au tou. Ia bara mololita moula peundeaNa haduduaNa. Apa au Nahadi hangko i UmaNgku, iti au Napololita. Hai Ia ina mopahawekau apa au mewali i alo au ina mai. 14 Ia ina mopakahileNa, lawi lolita au Natarima hangko Iriko, itimi au Napahawekau. 15 Ope-ope au ara i UmaNgku, ara wori Iriko. Ido hai Kuuli: apa au natarima Inao Malelaha hangko Iriko, itimi au Napahawekau." 16 Nauli mbuli Yesu: "Hampalai pearai, barapoNa ina niita. Hampalai pearai wori, ina niita mbuliNa." 17 Wulimohe topeguruNa, hai arahe au mombekune-kune, rauli: "Apa tunggaiaNa pane Nauliangaake: 'Hampalai pearai, barapoNa ina niita. Hampalai pearai wori, ina niita mbuliNa'? Hai apa mbuli tunggaiaNa pane Nauli: 'LaoNa i UmaNgku?'" 18 Mombekune-kune liliuhe, rauli: "Moapa hai Nauli liliu: 'Hampalai pearai'? Bara taisa lempona." 19 Naisa Yesu karapeinaonda mekune Iria. Ido hai Nauliangaake: "Mombekune-kunekau apa lempona lolitaNgku inona au manguli: 'Hampalai pearai, barapoNa ina niita. Hampalai pearai wori, ina niita mbuliNa.'" 20 Tou mpuu lolitaNgku ide: ina moteriakau, agayana tauna au bara mepoinalai Iriko, matana mpuuhe. Ina masusa lalumi, agayana kasusami iti ina tebaliki mewali kamatanami. 21 Kamatanami iti, ina nodo kamatana au nalambi hadua towawine au ina moana. Nguru-nguruna mantodiha, lawi nodomi tempona moana. Agayana ane mesupa anana, towawine iti barapi mokatinao pantodihana, matanami lawi mesupami anana i dunia. 22 Nodo wori ikamu: ide-ide masusa lalumi. Agayana ina Kupohidupaa mbulikau. I tempo iti, ina matana hulekau, hai bara ara au peisa moala kamatanami iti hangko irikamu. 23 I tempo iti, barapi paraluu nipekune ba apa-apa Iriko. Tou mpuu lolitaNgku ide: apa pea au niperapi i UmaNgku i lalu hangaNgku, batena mpuukau Nawei. 24

Duuna ide-ide, bara manikau merapi apa-apa i lalu hangaNgku. Perapimide, hai ina nihumba bona buke ntepuu kamatanami." 25 "Ope-ope ide Kuuliangaakau hai ngkora pandiri. Agayana hambela tempo barapi Kupake ngkora pandiri. Ina Kupololitaakau kana i UmaNgku i kanoto-notoana. 26 I tempo iti, ina merapikau i UmaNgku i lalu hangaNgku. Barapi paraluu Kuperapiakau apa au niparaluu i UmaNgku, 27 lawi UmaNgku haduduaNa au mampokaahikau. Ia mampokaahikau, lawi nipokaahiNa, hai nipoinalai kaIkona au hangko i Pue Ala. 28 MaimoNa i dunia ide hangko i UmaNgku. Ide-ide, Kupalehimi dunia ide, hai mesuleNa lao i UmaNgku." 29 Rauli topeguruNa: "Pue, ide-ide manotomi lolitaMu, lawi barapoKo mopake ngkora pandiri. 30 Manoto irikami: Oyo au moisa ope-ope. Barapi ara pampekuneki Irio. Ide-ide kipoinalai mpuu kaOyona hangko i Pue Ala." 31 Nauli Yesu: "Ba mepoinalai mpuukau ide-ide? 32 Nikatuinao! Ina hawe tempona hai katouana hawemi tempo iti, ina melangkakau hadua-hadua lao i soumi, hai ina nipalehiNa. Agayana barana haduduaNgku, lawi UmaNgku mamporangaiNa. 33 Ope-ope ide Kuuliangaakau, bona molambikau katinda lalu hangko i pohintuwumi hai Iko. Tangami mani i dunia ide, batena rapopeahi-ahikau. Agayana nipakaroho lalumi, lawi Kunangimi kuasa tokadake au ara i lalu dunia ide."

17:1 Karoona Yesu mopahawe ope-ope iti, mengoami i langi hai mekaka, Nauli: "UmaNgku, hawemi tempona! PakahilemoNa Iko AnaMu, bona Iko wori mopakahileKo Uma. 2 NuweimoNa kuasa motadulakoi ope-ope tauna, bona tauna au NuweiNa, Kuweihe katuwo maroa au bara mokahopoa. 3 Ane moisahe kaOyona Pue Ala au tou au bara ara karoduaMu, hai moisahe kaIkona Yesu Kerisitu au Nutudu mai, itimi au rauli katuwo maroa au bara mokahopoa. 4 Uma, i lalu dunia ide Kutudungiamohe peawana tuwoMu. Kuparoomi bago au NuweiNa. 5 Ido hai Kuperapi bona NupopeawaNa hule hihimbela hai Oyo, nodo peawaNta hangko damani dunia ide rapopewali. 6 Ane tauna au NuweiNa hangko i dunia ide, Kupopaisaamohe kahemaMu Uma. KiraMumohe; Nuhuhuhe Iriko, hai mampeulaimohe lolitaMu. 7 Ide-ide, moisamohe:

hinangkana au NuweiNa, batena hangko Irio, Uma. 8 Kupahaweamohe ope-ope lolita au NupahaweaNa. Lolita iti ratarimami, hai ide-ide moisamohe kaKona hangko Irio Uma. Mampoinalaimohe kaOyona au motuduNa. 9 Kupekakaengaahe topeulaNgku iti. Barahe Kupekakaengaa ope-ope tauna i dunia. Au Kupekakaengaa, batena pea tauna au NuweimoNa Uma, lawi ihirami kiraMu. 10 Ope-ope tauna au mewali kiraNgku, kiraMu worimohe. Hai ope-ope tauna au mewali kiraMu, kiraNgku worimohe. Ihirami au mopatongawa peawana tuwoNgku. 11 Ina maiNa Irio Uma, barapoNa mahae i dunia ide. Agayana topeulaNgkuhe ide, i dunia manihe. O UmaNgku au malelaha, Nukampaimohe hai kuasana hangaMu au NuweiNa. Kadipuramohe bona hampepekiri peahe, nodo Oyo hai Iko hampepekiriKe. 12 TangaNgku mani hihimbela hai ihira, Ikomi au mokampaihe hai kuasana hangaMu au NuweiNa. Kukampaihe datihe ara au matanta. Batena pea hadua au matanta, iami au ina molambi rugi bona tepabukei apa au teuki i lalu Sura Malelaha. 13 Ide-ide, ina laoNa Uma Irio. Ope-ope ide Kuuli i tempoKu mani hihimbela hai ihira i dunia ide, bona buke kamatananda au ralambi hangko Iriko. 14 Kupahaweamohe lolitaMu, alanda tauna au bara mepoinalai mokahihihe, lawi barahe ranganda. Nodo wori, Iko barana ranganda tauna iti. 15 Bara Kuperapi bona Nualahe topeulaNgku hangko i dunia ide. PamperapiKu bona Nupeparaihe hangko i Datu Tokadake. 16 Iko barana ranganda tauna au bara mepoinalai, nodo wori topeguruNgku barahe ranganda. 17 Nupamalelahamohe, hai Nupopewalimohe kiraMu anti paturoMu au tou. NgkoraMu Uma, itimi au tou. 18 Uma, NutuduNa mai i dunia. Nodo wori Iko motuduhe lao i tauna ntanina i dunia. 19 Uma, Kuhuhumi katuwoNgku Irio mewali kiraMu, bona ihira mewali kiraMu i pampeulainda paturo au tou. 20 Bara pea topeguruNgku iti au Kupekakaengaa. Kupekakaengaa wori tauna au ina mepoinalai Iriko hangko i posabinda. 21 PamperapiKu bona ihira ope-ope hampepekiri. Nodo Uma mohintuwu hai Iko, hai Iko mohintuwuNa hai Uma, Kuperapi bona ihira wori mohintuwu hai Ikita bona ope-ope tauna ina mampoinalai kaOyona au motuduNa. 22 Kuweimohe peawa au NuweiNa, bona mewalihe hampepekiri, nodo wori Ikita hampepekiriKe. 23 Iko mohintuwu hai ihira, hai Oyo mohintuwu hai

Iko, bona ihira ina mewali mpuuhe hampepekiri. Ane nodo, ope-ope tauna ina moisa kaNutuduNgku hai kaNupokaahinda tauna iti au mepoinalai Iriko. AhiMu irihira himbela hai ahiMu Iriko. 24 Uma, peundeaku bona ihira au NuweiNa ina maida hihimbela hai Iko i paidaangku, bona moitahe peawaNgku. PeawaNgku iti NuweimoNa, lawi NupokakayaNa hangko damani dunia ide rapopewali. 25 O UmaNgku au manoto, tauna i dunia ide bara moisa Oyo. Agayana Iko, KuisaKo. Hai ope-ope tauna au mepoinalai Iriko moisa kaOyona au motuduNa. 26 Kupopaisaamohe kahemaMu, hai batena Kupahawe liliu kahemaMu, bona ihira mampokaahi ranganda nodo Oyo mampokaahiNa, hai bona mohintuwuhe hai Iko."

18:1 Karoona Yesu mekakae, meangkami hai topeguruNa lao i raoa kota. Mowetamohe owai Kidron laohe i bonde au i tanda orupena. 2 Yudasi, au mampobalu Yesu, moisa kaiumbana bonde iti, lawi Yesu hai topeguruNa dokohe mogulu inditi. 3 Mewali Yudasi laomi i bonde iti hihimbela hai hamporangaa surodado to Roma hai topokampai Souna Pue Ala au rapohawahe kapala-kapala tadulako menomba hai to Parisi lao mohaka Yesu. Moantihe pakakasi pombeala, lantera hai hulu. 4 Naisa Yesu ope-ope au hangangaa mewali i wataNa. Ido hai laomi mampohidupaahe tauna iti, Napekune: "Hema au nihaoki?" 5 Rauli: "Yesu to Nasare." Nauli Yesu: "Ikomi ide." Yudasi, au mampobalu Yesu i iwaliNa, meangka inditi hihimbela hai ihira. 6 I kanauliangaanda Yesu: "Ikomi ide," mousulimohe hai madungkahe i tampo. 7 Napekune mbuli Yesu: "Hema au nihaoki?" Rauli: "Yesu to Nasare." 8 Nauli Yesu: "Kuulimi inona, Ikomi ide. Mewali, ane Iko mpuu au nihaoki, nipogiangaamohe rangaNgku ide padu." 9 (Nauli nodo bona tepabukeimi apa au Nauli i lalu pekakaeNa inona: "Hangko i ope-ope tauna au NuweiNa, bara ara hadua au matanta.") 10 Hangko indo, Simo Peturu mowuka pihona mobata hadua hawina Tadulako Menomba Mahile, kana talinga koanana pane maingihi. Hangana hawi iti, Malkus. 11 Nauli Yesu i Peturu: "Pusa hule pihomu! Ba nupehangu Kuposulia kapari au napakanotoa amimoNa UmaNgku?" 12 Hangko inditi, surodado to Roma hai tadulakonda, hai topekampai au

ratudu tadulakonda to Yahudi, laomohe mohaka Yesu. Ia rahilu 13 hai raanti lao i souna Tadulako Menomba Mahile. Nguru-nguruna raanti lao i Hanas, pengantina Kayapas. Kayapas iami Tadulako Menomba Mahile i pare iti. 14 Kayapas iti au mouliangahe tadulakonda to Yahudi hangkoya: "Aginami hadua tauna mate mopahuru ope-ope tauna." 15 Simo Peturu hai hadua topeguruNa au ntanina meulahe i Yesu. TopeguruNa au hadua iti, hampombekaisangana Tadulako Menomba Mahile. Mewali, topeguruNa iti mesuami hihimbela hai Yesu i tabangaa souna Tadulako Menomba Mahile. 16 Peturu mepegia pea i raoa babaka. Hangko inditi, topeguruNa au hadua iti, lao hulemi i raoa mololita i towawine au mokampai baba, ido hai Peturu rapaliu mesua i lalu hihimbela hai ia. 17 Towawine topokampai baba iti mouliangaa Peturu: "Bara pae oyo wori hadua topeguruNa tauna olou?" Nauli Peturu: "Bara!" 18 I tempo iti, tempo makuli. Mewali, bahangkia hawi hai topekampai mopatuwo api i tabangaa, hai meangkahe motoleliki api rapamindui. Peturu wori meangka hai mamindu hihimbela hai ihira. 19 I lalu sou iti, Tadulako Menomba Mahile mekunemi i Yesu, nauliangaa: "Hemahe ope-ope topeguruMu? Apa au Nupaturoahe?" 20 Nauli Yesu: "MololitaNa i katou-touana i ope-ope tauna. Mepaturo liliuNa i sou penombaa hai i Souna Pue Ala, au paka rapoteruhui to Yahudi. Bara ara au Kuwuniangi. 21 Mewali, moapari hai nupekuneNa nodo? Nupekunemi i tauna au mohadiNa mepaturo. Hangangaa raisa mpuu apa au Kuuli." 22 Kanaulina Yesu nodo, hadua topekampai au meangka i holaNa mohapami lindoNa, nauli: "Bai mpuuKo mololita nodo i Tadulako Menomba Mahile!" 23 Nauli Yesu: "Ane bara tou au Kuuli, nuuli peami inde apa salaNgku. Agayana ane tou lolitaNgku, moapa hai nuhapaNa?" 24 Hangko inditi, Hanas motudumohe topekampai moanti Yesu lao i Tadulako Menomba Mahile Kayapas. I tempo iti, tayena Yesu tehilu mani. 25 Simo Peturu, meangka mamindu hihimbela hai topekampai. Arahe tauna au mouliangaa: "Bara pae oyo wori hadua topeguruNa?" Nasapuakami Peturu, nauli: "Bara wongkoya iko!" 26 Ara wori inditi hadua hawina Tadulako Menomba Mahile. Hawi iti halaluna tauna au nabata Peturu talingana. Nauli hawi iti i Peturu: "Bara pae oyo au kuita inona i bonde iti hihimbelako hai Yesu?" 27 Nasapuaka mbulimi Peturu,

nauli: "Bara!" I tempo iti, motuturuami manu. 28 Madondo-dondo, Yesu raanti hangko i souna Kayapas lao i souna gubernur. Tadulakonda to Yahudi, barahe mesua i lalu souna gubernur datihe mewali kedai moula atura agamanda to Yahudi, lawi gubernur iti bara to Yahudi. Hai ane mesuahe i lalu souna, barahe peisa moande paande Pasa. 29 Mewali, Gubernur Pilatu laomi i raoa mampohidupaahe hai mampekunehe: "Apa au nialaia tauna ide?" 30 Rauli: "Ane rapana ia bara tauna au kadake, kebara kianti i Gubernur." 31 Nauli Pilatu: "Nialami hai nianti hule! Nipohuda-hudaami salana moula ada agamami haduduami!" Rauli to Yahudi iti: "Ikami, barangkai rapaliu mohuku mate tauna." 32 (Ide mewali bona tepabukei apa au nauli Yesu kana i kapateNa.) 33 Hangko inditi, Pilatu mesua hulemi i lalu sou, hai natudumohe taunana moanti Yesu i lindona, hai napekune: "Ba Oyo mpuu datunda to Yahudi?" 34 Nauli Yesu: "Ane lolitamu iti, ba hangko irio haduduamu, ba nuhadi iti hangko i tauna ntanina?" 35 Nauli Pilatu: "Iko barana to Yahudi! Hangka to YahudiMu hai kapala-kapala tadulako menomba au moantiKo mai iriko. Sala aparti au Nubabehi?" 36 Nauli Yesu: "Iko, barana nodo datu au moparenta i dunia ide. Ane kenodoNa datu i dunia ide, tauna au meula Iriko batena mobungka-bungkahe bona ineeNa rahaka hai rahuhu i tadulakonda to Yahudi. Agayana barana datu au hangko i dunia ide." 37 Nauli mbuli Pilatu: "Ane nodo, tou mpuu pae datuKo?" Nauli Yesu: "Tou mpuu kanuulina Iko ide datu. Ido hai rapoanakaNa i dunia ide, bona Kupahawe apa au tou. Tauna au mounde moula apa au tou, mampoinalaihe lolitaNgku." 38 Nahanai Pilatu: "Apari lempona Nuuli au tou iti?" Roo indo, lao mbulimi Pilatu i raoa mouliangahe to Yahudi: "Nauri hampaka kanawoana, bara ara kulambi. 39 Agayana, moula adami, pare-parena i alo Posusa Pasa, kukabahaakau hadua toratarunggu, ba hema peundeami. Mewali, noumba? Ba niunde ane kukabahaakau datunda to Yahudi ide?" 40 Monganga-ngangamohe, rauli: "Inee, inee Ia! Aginari Baraba!" (Baraba iti, hadua toperampaki.)

19:1 Roo indo, Pilatu motudumohe surodadona bona Yesu raala hai rakandangi. 2 Surodado iti mobabehimohe hambua songko hangko i walaa

au modui, hai rasongkoia Yesu. Roo indo, ia rabadui hai badu au malei maleleintoro nodo badu datu. 3 Motumpamohe i lindoNa, rauliangaa: "KibilaKo, datunda to Yahudi!" Roo indo, rahapami lindoNa. 4 Hangko inditi, mesuwu mbulimi Pilatu lao i raoa, nauliangaahe to Yahudi: "Peita, kuantimi mai irikamu, bona niisa kadana kulambi salaNa nauri hampaka." 5 Hangko inditi, raantimi Yesu i raoa, mesongko dui hai mebadu hai badu au malei maleleintoro nodo badu datu. Nauli Pilatu: "Nipeita tauna ide!" 6 I temponda kapala-kapala tadulako menomba hai topekampai moita Yesu, mongangamohe, rauli: "Pakumi i kau! Pakumi i kau!" Nauli Pilatu: "Ane nipeinao mopaku i kau, nialami. Ikamu au hangangaa mopaku i kau, lawi iko, bara kulambi salaNa." 7 Rauli to Yahudi: "Ane ikami, moula aturana agamangki, hangangaa rahuku mate, lawi Nauli kalana Anana Pue Ala." 8 Kanahadina Pilatu iti, tetambaimi kalangana. 9 Mesua hulemi i lalu souna, hai mekune mbuli i Yesu: "Hangko iumbaKo mai?" Agayana Yesu bara mehana. 10 Nauli mbuli Pilatu: "BaraKo pae mau mohanaina? Bona Nuisa, iko ide, ara kuasanku mokabahaKo ba mopakuKo!" 11 Nauli Yesu: "Ane barako nawei Pue Ala kuasa iti, bara ara kuasamu Iriko. Mewali, iami au mohuhuNa irio, meliu kamahilena dosana hangko irio." 12 Meponga indo, Pilatu mohaoki rara bona mokabaha Yesu. Agayana monganga mbulimohe to Yahudi, rauli: "Ane nukabaha, barako rangana Kaisar! Yesu iti mouli kalana datu, mewali Ia moewa Kaisar!" 13 Kanahadina Pilatu lolitanda, ia moantimi Yesu i raoa. Roo indo, mohudami i pohudaa pobotusia i hambua paidaa au rahanga Lanta Watu. (I lalu basanda to Yahudi hangana Gabata.) 14 I tempo iti, ina pualomi, hangalo hangko damani alo Posusa Pasa. Pilatu mouliangaahe to Yahudi: "Idemi datumi!" 15 Monganga-ngangamohe, rauli: "Papate! Papate! Paku i kau!" Nauli Pilatu: "Nipopepaku mpuu pae datumi?" Rahanai kapala-kapala tadulako menomba: "Kaisar pea datungki." 16 Kahopoana Pilatu mohuhumi Yesu irihira bona rapaku i kau. Hangko inditi, surodado 17 mopari-parihe Yesu motalondo kau mombehape lao i raoa kota hawe i Bulu Bangawaa. (I lalu basanda to Yahudi hangana Golgota.) 18 Inditi, mopakumohe Yesu i kau. Ara wori rodua tauna ntanina au rapaku i kau hihimbela hai Ia, hadua tanda i kabeoNa, hadua tanda i koanaNa. 19 Pilatu

motudu surodadona mopataka hampeka pata i kau popakuana Yesu. I pata iti, teuki: YESU TO NASARET, DATUNDA TO YAHUDI. 20 Ukina iti rauki i lalu talu pakana basa: basanda to Yahudi, basanda to Roma, hai basanda to Yunani. Bosa to Yahudi mobasa uki i pata iti, lawi popakuana Yesu hungku i kota. 21 Mewali, tadulako menomba mouliangaa Pilatu: "Inee rauki: Datunda to Yahudi! Agina rauki: 'Tauna ide mouli kaana datunda to Yahudi.' " 22 Nauli Pilatu: "Apa au kuuki, bara ina kubaliki!" 23 Karoonda surodado mopaku Yesu, hampina raalami hai rakira iba, hadua-hadua hantau. Agayana baduna, bara ara podaloana, lawi ratanu bona mewali hantau bana. 24 Ido hai mohawamohe surodado, rauli: "Inee taboho-boho badu ide. Agina motendeke dadu mopakanoto hema au molambi." Iti mewali bona tepabukei apa au teuki hangkoya i lalu Sura Malelaha, au manguli: "Hampiku raala hai rakira-kira. Au molambi badu ngku rapakanoto hai dadu." (Mazmur 22:18) Mewali, apa au rababehi surodado iti, batena mewali nodo au teuki hangkoya. 25 Hungku i popakuana Yesu, meangkami inana hai hadua halaluna inana au towawine wori. Ara wori Maria towawinena Klopas, hai Maria Magdalena. 26 Kanaitana Yesu inana meangka inditi i holana topeguruNa au Napokakaya, ia mouliangaa inana: "Ina, idemi anamu." 27 Hai Nauliangaa mbuli topeguruNa iti: "Idemi inamu." Roo indo, topeguruNa iti mokadipura inana Yesu i lalu souna. 28 Naisa Yesu katepahoponami ope-ope, hai Nauli: "MangkadouNa" bona tepabukei apa au teuki i lalu Sura Malelaha. 29 Inditi, ara hamangko anggoro au mangilu. Arahe tauna au lao moala hambua lomo, raeme i anggoro iti, rawoli i wuntu daangkau, hai rapakana i humena Yesu bona Naenu. 30 Napeminami Yesu, pane Nauli: "Hopomi!" Roo indo, motumpami, hai mabotumi inoNa. 31 Alo karapakuna Yesu i kau iti mewali hangalo hangko damani alo penombaanda to Yahudi, hai moula palianda bara peisa ara tomate au tetoe i kau mombehape i alo penombaa. Apa mani lawi ina kana Posusa Pasa. Ido hai tadulakonda to Yahudi merapi i Pilatu bona torapaku itihe ratepo bitinda bona holigahe mate. Merapi worihe bona watanda rapopendaulu. 32 Mewali, lao mpuumohe surodado motepo bitinda au rodua au rapaku i kau hihimbela hai Yesu. 33 Agayana kahawenda i Yesu,

raita matem. Barapi mewali ratepo bitina. 34 Agayana ara hadua surodado au motambuku lompeNa hai tawalana. Karatambukuna iti, moilimi wahe hai owai. 35 Tauna au moita au mewali iti, iami au mopahaweakau apa au naita, bona mepoinalai worikau. Lolitana ide tou, hai ia moisa katouna. 36 Iti mewali bona tepabukei apa au teuki hangkoya i lalu Sura Malelaha au manguli: "Bara mpuu ara hambua buuNa au ina ratepo." 37 Ara wori au teuki i lalu Sura Malelaha au manguli: "Ihira ina mampengoahae au ratambukumi." 38 Roo indo, ara hadua tauna au rahanga Yusupu hangko i boea Arimatea. Ia mepoinalai ngkandii i Yesu, lawi mampokalanga tadulakonda to Yahudi. Kapatena Yesu, Yusupu laomi i Pilatu, hai mamperapi watana Yesu bona ratawu. Napaliumi Pilatu, mewali laomi Yusupu mangala watana Yesu. 39 Ara wori hadua tauna au lao hihimbela hai Yusupu, hangana Nikodemus. Hangkoya Nikodemus iti au lao mohidupa hai Yesu i tanga kaindi. Laomohe rodua tauna iti mopasilolonga watana Yesu. I kalaonda, Nikodemus moanti lana wongi, au rahanga mur hai gaharu, kira-kira talu pulona kilo kamantimina. 40 Tauna au rodua iti mangalamohe watana Yesu, rabungkuhi bana bula au roomi rapambolii lana wongi moula ada popatawu to Yahudi. 41 Hungku i popakuana Yesu, ara hambua bonde, hai i lalu bonde iti ara kalolu i tabingke bulu au rapasilolonga mewali talumba. Talumba iti wou mani, bara mani hambela rapopatawui. 42 Mewali, lawi hungkumohe i talumba iti hai barapi mahae ina mepongka alo penombaa, ido hai watana Yesu holiga rawoli i lalu talumba iti.

20:1 Madondo-dondo i alo Minggu, i tempona mani makaindi, Maria Magdalena laomi i talumba. Hawe inditi, liliu naita watu petuko baba talumba tebungkahimi. 2 Roo indo, ia melangkami lao i Simo Peturu hai hadua topeguruNa au napokakaya Yesu, nauliangaahae: "Watana Pue raalami hangko i talumbaNa, hai bara kiisa kaiumbana rawoli!" 3 Laomohe Peturu hai topeguruNa au hadua iti i talumba. 4 Roduahe melangka sambela, agayana meliu kamagasina topeguruNa au hadua pane Peturu, ido hai iyoru hawe i talumba. 5 Napelogami i laluna, agayana bara hampai mesua. Naitami bana au rapopobungkuhi Yesu arato inditi. 6 Roo

indo, Simo Peturu hawemi hai liliu mesua. Naita worimi bana popebungkuhiNa. 7 Agayana bana au rapopowewe waana Yesu, tewilolo hai tepatani hangko i bana ntani. 8 Hangko inditi, topeguruNa au hadua, au iyoru hawe i talumba inona, mesua worimi. Ia moitami apa au ara i lalu talumba iti, pane napoinalai. 9 Duuna hawe i alo iti, bara manihe moisa apa au teuki i lalu Sura Malelaha hangkoya au mopakanoto: "Ia hangangaa tuwo hule." 10 Roo indo, mesulemohe topeguruNa au rodua iti lao i sounda. 11 Agayana Maria Magdalena meangka i raoa talumba, moteria liliu. Tangana moteria, ia mampeloga i lalu talumba. 12 Unga pea naita rodua malaeka au mebadu bula hai mohudahe i karadampaana watana Yesu hangkoya, hadua tanda i waaNa, hai hadua tanda i bitiNa. 13 Mekunehe malaeka iti i Maria, rauli: "Ina, moapari pane moteriako?" Nauli Maria: "Ampuku raalami hangko inde, hai bara kuisa iumba rawoli." 14 Hangko inditi, membalilimi Maria hai naita hadua tauna meangka i taleuna. Katouana Yesumi, agayana bara naisa kaYesuna. 15 Mekunemi Yesu iria: "Ina, moapari hai moteriako? Hema au nuhaoki?" Nauli laluna Maria: ba ampu bonde au kuita ide. Ido hai nauliangaa: "Tua, ane Oyo au mangala wataNa, Nutudungiaana iumba paidaana, bona kualala." 16 Nauli Yesu: "Maria." Membalilimi Maria i Yesu, hai nauli i lalu basanda to Yahudi: "Rabuni!" (Lempona: "Guru.") 17 Nauli Yesu i Maria: "IneeNa hampai nukingki, lawi bara maniNa mengkaore lao i UmaNgku. Laomoko i topeguruNgku, nuuliangaaha kalaoNgkumi i UmaNgku hai Umamu wori, Pue AlaNgku hai Pue Alamu wori." 18 Laomi Maria Magdalena mampohidupaahe topeguruNa, nauli: "Kuitami Pue!" Hai napahaweamohe ope-ope au nauli Yesu. 19 Kaindina i alo Minggu iti, topeguruna Yesu moguluhe i sou au tegili babana, lawi mampokalangahe tadulakonda to Yahudi. Unga pea hawe Yesu meangka i olonda, hai Natabehe, Nauli: "Roa ngkatuwo hawe irikamu." 20 Roo indo, Natudungiaamohe tayeNa hai lompeNa. Matana ntepuu lalunda moita Ampunda. 21 Nauli mbuli Yesu: "Katinda lalu hawe irikamu. Nodo UmaNgku motuduNa, nodo wori Iko motudukau." 22 Roo indo, Natawueamohe inaoNa pane Nauli: "Nidokomi Inao Malelaha. 23 Hema au niampungi dosana, Pue Ala wori moampungi. Hema au bara niampungi dosana, Pue Ala bara wori

moampungi." 24 Tomas, hadua hangko i au hampulo hai rodua topeguruNa au rauli Toporopa, bara ara hihimbela hai ranganana i kahawena Yesu nguru-nguruna. 25 Ido hai ranganana mouliangaa: "Kiitami Pue!" Agayana nauli Tomas: "Ane bara kuita pepakua i tayeNa hai kupetobo pepakua iti, hai ane bara kuperera petambukua au i lompeNa, batena bara kupoinalai." 26 Liumi haminggu, mogulu mbulimohe topeguruNa i lalu sou iti. I tempo iti, Tomas ara hihimbela hai ihira. Ragilimi ope-ope baba, agayana nauri nodo, unga pea hawe Yesu meangka i olonda, Nauliangaahe: "Katinda lalu hawe irikamu." 27 Roo indo, Ia mouliangaa Tomas: "Wolimi karawemu inde, hai peita pepakua au i tayeNgku. Nuperera petambukua au i lompeKu. Inee bata-bata lalumu. Nupoinalaimi!" 28 Nauli Tomas: "Oyomi Ampuku hai Pue Alangku!" 29 Nauli Yesu i Tomas: "Mepoinalaiko lawi nuitamoNa. Morasihe tauna au mepoinalai Iriko, kehapiriNa bara raita." 30 Ngkaya mani tanda kuasa au nababehi Yesu hai au raita topeguruNa, agayana bara ope-ope teuki i lalu sura ide. 31 Agayana apa au kuuki ide, kuuki bona nipoinalai kaYesuna Datu Topehomo, Anana Pue Ala, hai bona molambikau katuwo maroa au bara mokahopoa hangko i pepoinalaimi Iria.

21:1 Roo indo, Yesu mopatongawa wataNa hambela mani i topeguruNa, i wiwi Rano Tiberias. Node tuntukana: 2 Bahangkia topeguruNa moguluhe inditi, iami Simo Peturu, Tomas au rauli Toporopa, Natanael hangko i boea Kana i tampo Galilea, anana Sebedeus au rodua, hai rodua topeguruNa au ntanina. 3 Nauli Simo Peturu i ranganana: "Laona modala." Rauli ranganana: "Lao woringkai." Lao mpuumohe mesawi i duanga hai modala i rano. Agayana i lalu hambengia iti, bara huba hambaa au kana dalanda. 4 Hungku mabaami, Yesu meangka i wiwi rano, agayana barahe moisa kaYesuna. 5 Nauliangaahe: "Halalu, ba ara baumi?" Rauli: "Bara huba hambaa." 6 Nauliangaahe: "Nitende dalami tanda i koanana duangami, batena ina morasikau." Motende mpuumohe dalanda, hai barapi rabuku modii, lawi ngkaya ntepuu ikane au ara i laluna. 7 Hangko inditi, topeguruNa au napokakaya Yesu mouliangaa Peturu: "Olou mai Pue!" Kanahadina Peturu lolitana, napusami baduna (lawi ia bara mebadu), hai

mengkanawo i owai monangu lao i lorena. 8 TopeguruNa au ntanina, liliuhe i duanga, modii dala au buke ikane lao i wiwi rano. Barahe karao hangko i lorena, kira-kira hangatu pea mete. 9 Kamendaulunda i lorena, moitamohé api au tuwo inditi, hai i wongko api ara ikane hai ara wori roti. 10 Yesu mouliangaaha: "Anti mai bahangkia baana ikane au hangko nipakala." 11 Simo Peturu mengkahemi i duanga hai modii dalana lao i lorena. Dala iti buke hai ikane au mahile: hangatu lima pulona hai talu baana kangkayana. Agayana nauri nodo kangkayana, bara wori mahepa dala iti. 12 Nauli Yesu: "Maimokau maande." Bara ara hadua topeguruNa au bai mekune Iria: "HemaKo?" lawi manotomi i lalunda kaJanato Pue Yesu. 13 Laomi Yesu mangala roti hai Naweihe. Nodo wori kaNababehina hai ikane. 14 Itimi kataluna belana Pue Yesu mopatongawa wataNa i topeguruNa mepongka i katuwoNa hule. 15 Karoonda maande, Yesu mouliangaa Simo Peturu: "Simo anana Yona, ba nupokaahiNa meliu hangko i pepokaahinda rangamu iti Iriko?" Nauli Peturu: "Io, Pue. Nuisato kakupokaahiMu." Nauli Yesu: "Ane nodo, nukadipurahe ana dimbaKu." 16 Roo indo, Yesu mekunemi i Peturu i karombelana: "Simo, anana Yona, ba nupokaahiNa?" Nauli Peturu: "Io, Pue. Nuisato kakupokaahiMu." Nauli Yesu: "Ane nodo, nukadipurahe dimbaKu." 17 Hangko inditi, Yesu mekunemi i kataluna belana: "Simo, anana Yona, ba nupokaahiNa?" Masusa laluna Peturu, lawi Yesu mekune i kataluna belana ba napokaahi mpuu. Mewali, nauli Peturu: "Pue, Nuisa hinangkana. Nuisa kakupokaahiMu." Nauli Yesu: "Ane nodo, nukadipurahe dimbaKu. 18 Tou mpuu lolitaNgku ide: i tempomu mani mangura, nuwewe komo i pekomu, hai laoko iumba pea peundeamu. Agayana ane saemoko hangalo, ina nuhuhu tayemu rataka tauna ntanina hai raantiko lao i paidaa au bara nuunde." 19 Hai lolitaNa iti, Yesu mopakanoto noumba Peturu ina rapapate bona hangana Pue Ala rapakahile. Roo indo, nauli mbulimi Yesu i Peturu: "Meulamoko Iriko!" 20 Hangko inditi, membalilimi Peturu, moita hadua topeguruNa au napokakaya Yesu au meula irihira. (TopeguruNa iti iami au mohuda i holana Yesu hangkoya tanganda maande kaindi hai mekune Iria: "Pue, hemari au ina mampobaluKo?") 21 Kanaitana Peturu topeguruNa iti, napekunemi i Yesu: "Pue, apa au ina mewali i rangangku

iti?" 22 Nauli Yesu: "Ane Kuunde bona ia tuwo liliu duuNgku hawe i karombelana, bara paraluu nuisa! Meula peamoko Iriko." 23 Hangko inditi, tebambarimi i topeulana Yesu, kadana ina mate topeguruNa iti. Agayana bara iti au nauli Yesu. Agayana noderi: "Ane Kuunde bona ia tuwo liliu duuNgku hawe i karombelana, bara paraluu nuisa!" 24 TopeguruNa iti au moita hinangka au mewali hai au mopahawe posabina. Iami au mouki sura ide. Hai taisa katouna lolita ide. 25 Ngkaya mani au nababehi Yesu, agayana ane hinangkana au Nababehi iti rauki i lalu sura, kira-kira humalele dunia ide bara handa rapambolii sura iti.